

說
庫


第三十三冊

高坡異纂
否泰錄
說不觚
聽錄



高坡異纂序

予少日讀書凡編簡中所載神仙詭怪之說心竊厭之一見即棄去雖讀之亦多不能終其辭正德嘉靖間兩見邑中怪事始歎古人紀載未必皆妄天地造化之妙有無相乘終始相循夢想聲色倏忽變幻皆至理流行持其中有暫而不能久變而不能常者人目不能精思而詳察之耳豈可盡謂誕妄哉及居京師文字交游殆遍天下皆世之大賢君子也其所言神怪異常之事或本於父老之真傳或即其耳目之親記鑿鑿皆有依據時因休沐祥符高氏子業繁昌謝氏鳳儀日來問訊每舉所聞以解予病懷因以新舊所得去其鄙褻凡陋荒昧難憑者十之五六錄成三卷題曰高坡異纂聊以著造物之難測証古人之不誣也高坡者京坻之里名異纂者瑣屑談談不足於立言云耳嘉靖壬辰仲秋六日



明常熟楊儀夢羽著

周顛仙不知其名。自言建昌人。年十四。忽患心疾。突入南昌府。長身奇貌。持瓢乞食市中。每新官至。必進謁曰。告太平。人習知之。不甚異也。高皇帝定南昌。顛仙謁於道旁。左右扶之去。帝歸建業。顛仙亦來。隱語嫚詞。為帝所厭。又自言入水不溺。上命以巨缸覆之。束糖炬五尺圍緣。缸舉火。蘆盡不死。益至一束半。又不死。益至二束半。火滅發缸視之。烟在缸底。若張綿狀。顛仙端坐凜然。若在冰雪中。終不能傷。嘗以手畫地成圈。日破一桶。成一桶。乃令寄食蔣山寺中。月餘。主僧奏顛仙與沙彌爭食。因不食半月矣。帝親往察之。顛仙廣步來迎。殊無饑色。帝具饌於翠微亭。召賜同燕。將還。密詔主僧絕其飲食。積二十三日。帝又往賜之食。則復食。未幾。將西征。陳友諒問之。顛仙仰面上視。良久。正色搖手曰。天命不在。友諒可征也。已而舉杖導帝馬前。奮迅疾行。為壯士揮戈之勢。以示必勝。因令從征。師抵小孤山。見江豚戲水中。忽出謬說。言水怪見損人多。帝惡之。命將士引去。棄湖口水中。不能溺。明日復從諸卒至。求食於帝。食既。整裝而行。自是不復來見矣。更數年。顛仙遣天池寺赤脚僧至。

京師求見帝。帝以詩二首寄之。又四年帝偶不豫。赤脚僧復至。言天眼尊者及顛仙從廬山竹林寺遣送葯來。帝強起視藥。一曰溫良藥兩片。一曰溫良石一塊。令置金

盒中。楷背上。帝如法併服之。其夜疾良愈。赤脚僧復言。前上寄詩二神俱有和篇。書

山中石上。帝命錄二詩呈覽。天服尊者詩曰。聖主祥瑞合天基。如影隨形總是痴。奉

輪卽位四海居。明君有道乾坤廣。等閑一智聲如雷。周顛仙詩曰。初見聖主應天

基。一時風來一時疾。透片俱來猛。一統浩大乾坤正。此時人君自此安。邦定齊天洪

福謝恩馳我王感得龍。帝大喜。御製賜赤脚僧詩曰。跣足慙慙事有秋。空苦顛際孰

顏喜大興佛法富此時。帝大喜。御製賜赤脚僧詩曰。跣足慙慙事有秋。空苦顛際孰

為儔。愆銷累世冤魂斷。幻脫當時業海愁。方廣昔聞仙委跡。天池今見佛來由。神憐

黔首增吾壽。丹餌來臨久疾瘳。御製周顛仙人傳。刻石匡廬白鹿昇仙臺。是歲洪武

二十六年癸酉九月也。赤脚僧湖口人。姓沈氏。幼名住得。法名覺顯。早孤出家。洪武

初居蓮花寺。跣足不食五味。雲遊各寺。後入廬山天池寺修道。

張三丰。遼東懿州人。張仲安第五子也。有仙術。所言時事悉徵驗。由是人多崇信之。

元末居寶鷄金台觀。忽留頌而逝。土民楊軌山買棺斂之。臨窆。覺棺中展動有聲。發

視之。乃復生。以小鼓一腔留其家。去。秦遊蜀。登武當山。時至襄鄧間。洪武二十

四年。詔求之不得。永樂中。上遣禮科都給事中胡濙道錄任一愚岷州指揮楊永吉。

遍詣天下名山訪之。又勅正一道士孫碧雲建宮武當候之。終不遇。天順三年。誥贈為通微顯化真人。天順末。或隱或見。有親災問以大道者。專以仁義勸人。事皆先見。叩之響應。後往來鶴鳴山中。將半載。竟失所在。常至甘州。張指揮家。遣一中袖。及葫蘆。天順間。鎮守甘肅總兵官王敬患中滿疾。諸醫不能療。以中袖火煨服之。愈。成化初。定西侯蔣琬為總兵官。宴守臣於幕下。集伶人搬演三度城南雜劇。時座客有談及三丰者。因出葫蘆傳玩之。忽自震碎。所留楊氏小鼓。雖憂大鑪。不能混其聲。後亦亡去。嘗遊揚州瓊花觀。有題瓊花詩曰。瑤枝玉樹屬仙家。未識人間有此花。清氣不露。凡雨露。高標猶帶古烟霞。歷年既久。何曾老。舉世無雙。莫漫誇。使欲載回天上去。擬從博望借仙槎。語意清曠。若自況也。

余書三丰事。乃是懿州志中舊傳。因其詞近鄙拙。稍為刪潤入錄。初疑邈邈張別是一人。子業又持靈濟宮道士所藏刻本文。皇御書示予。但稱玄玄子。而不稱三丰先生。其時有張舉人。維乃尚質之弟也。自海南內徙當塗。其人酷慕神仙。亦云不能知。故不敢入。併邈邈張亦不復別出。近讀玉堂漫筆。載其說。晉蜀荆湘。皆文裕全。宦遊之地。所知必真。續錄於左。其中但曰天師之後。與懿志不合。豈仲安

即其苗裔耶。存疑可也。

玉堂漫筆云。相傳永樂初。遣胡忠安公巡行天下。以訪遺逸。張仙人。即張三丰。名通。號玄玄子。天師之後。寓居鳳翔寶雞縣之金臺觀。修煉。洪武壬申。常應蜀獻王之召。辭還山。金時人也。都太僕玄敬嘗為予言。蘇城人家有三丰手筆。蓋與太保劉秉中。冷協律起敬。同學於沙門海雲者。南陽張朝用嘗記三丰遺跡云。三丰陝西寶雞人。元時於鹿邑之太清宮學道。與朝用高祖毅相識。往來其家為親密。亦愛朝用之父。叔廉。元末兵亂。叔廉避地寶雞。洪武中。三丰亦來寶雞。與西關李道士白雲先生交契相厚。朝用時方年十三。三丰見之。問曰。汝誰家子。答曰。吾父杜城張叔廉也。兵亂徙家於此。三丰曰。我張玄玄也。昔柘城時多擾汝家。名毅者為誰。答曰。吾高祖也。三丰曰。吾曾見其始生時。童子其勉力讀書。後當官至三品。越月。朝用與李白雲送之北去。見其行足不履地云。朝用官詹事府主簿。忠安公以其常識三丰。薦之為均州知州。與同往尋訪。竟無所遇而還。十五年。文皇再遣寶雞醫官蘇欽等齎香書遍訪名山求之。又遣龍虎山道士奉書云。皇帝致書真仙張三丰。足下。朕久仰真仙。渴思親承儀範。嘗遣使致香奉書。遍詣名山虔請。真仙道德崇高。超乎萬有。體合自然。

神妙莫測。朕才質疎庸。德行菲薄。而至誠願見之心。夙夜不忘。故再遣龍虎山道士謹致香奉書虔請。拱候雲車風駕。庶然降臨。以副朕拳拳仰慕之懷。敬奉書。或云此舉實託之以別有所為。忠安固別有密勅云。又淮安王宗道字景雲。學仙嘗與三丰往來游從。永樂三年。國子助教王達善以宗道識三丰薦。文皇召見文華殿。賜金冠鶴氅。奉書香編訪於天下名山。越十年。足跡滿天下。竟無所遇。而還復命。

冷謙字啓敬。湖湘人。國初為協律郎。郊廟樂章多所撰定。謙有故人貧不能自存。知謙得異術。求濟於謙。謙曰。汝命薄。吾指汝一所有。贏金二錠。可以資助。但勿過取。不聽吾戒。吾與汝皆不利也。乃於壁間畫一門。一鶴守之。令其人敲門。門忽自開。入其室。金玉爛然盈目。其人恣取以出。而不覺遺其引。他日內庫失金。守藏吏獲引以聞。執其人訊之。詞及謙。因併逮謙。謙將至城門。謂逮者曰。吾死矣。安得少水以救吾渴。守門者以瓶汲水與之。謙遽以足插入瓶中。其身漸隱。守者懼罪。遂携瓶至御前。上問之。輒於瓶中奏對。上曰。汝出見朕。朕不殺汝。謙自言臣有罪。不敢出。上怒碎其瓶。片片皆應。終不知所在。與左總事上按籍錄庫中金。果餘二錠。張三丰嘗跋謙畫。蓬萊仙弄圖。有所謂畫鶴之証者。即此事也。併錄其辭曰。蓬萊仙弄圖者。龍陽子湖湘冷

君所作。君武陵人。名啟敬。龍陽其號也。中統初。與邢臺劉秉忠仲晦。從沙門海雲。書無不讀。尤邃於易。及邵氏經世天文地理律歷。以至衆技多通之。至元中。秉忠恭預中書省事。君乃棄釋從儒。游雪川。與故宋司戶參軍趙孟頫子昂。於四明史衛王彌遠府。覩唐李思訓將軍畫。頃然發之胸臆。遂效之。不月餘。其山水人物窠石等。無異將軍。其筆法傳彩。尤加纖細。人品幻出。由此以丹青鳴。當時隸淮陽。遇異人授中黃大丹。出示平叔悟真之旨。穎然而悟。如已作。至至正間。則百數歲矣。其綠髮童顏。如方壯不惑之年。時值紅巾之暴。君避地金陵。日以濟人利物。方葯如神。天朝維新。君有畫鶴之証。隱壁仙逝。則君之墨本絕跡矣。此卷乃至元六年五月五日為余作也。吾珍藏之。吾將訪冷君於十洲三島。恐後人不知冷君胸中丘壑三昧之妙。不識其奇仙異筆。混之凡流。故識此。特奉遺元老太師淇國丘公。覽此卷則神清氣爽。飄然意在蓬瀛之中。幸珍襲之。且以為後會云。時永樂壬辰孟春三日。三丰避老書。

蔡啟字士弘。別號毅齋。上世本崑山人。永樂中徙居北京。啟好少遊。常遇異人於歌樓。自稱王先生。相與甚善。一夕乘月步都市。時夜禁甚嚴。邏卒交錯於道。無所詰問。啟心異之。至東微頭。復遇二三客控馬以待。異人至。客前請行。異人曰。我攜卽君步

月至此諸君能更備一騎與同遊乎。須臾又控一馬至。甚雄俊。擁敝乘之。囑使閉目。雖甚苦。勿妄窺視。敝如教耳。邊但聞風濤聲。然寒極不能禁。言之甚力。異人嘆曰。此去四十里有罡風。過此即得上仙。恨子福淺耳。即令開目。乃在一野寺前。供帳甚盛。就樹下諸客縱談。皆非塵世間事。敝亦不能知也。因問此為何地。異人曰。此去白容縣十五里某寺也。敝縱觀。蹴起一石子。戲納金剛口中。酒數行。復與諸客乘馬還都市而別。漏下方四籌耳。居數日。異人告別。以一木杖贈敝。勉敝讀書進修。後當再會。珍重而去。故後以翰林秀才四舉不第。選中書。歷官員外郎。出守衢州府。道經丹陽。因至白容尋訪此寺。則固舊遊處也。遣人視金剛口中。石子猶在焉。始信王先生為神仙。既蒞衢。好道愈篤。忽一日有道士進謁。敝留飲入夕。道士遣一童子去席百步。解衣而立。時方隆冬。道士遙吐氣噓之。即汗出淋漓。煖如盛夏。既而口出風吹之。寒氣襲人。便欲僵仆。敝驚起曰。此庭中瓦礫山積。欲去之久矣。然未暇也。若能除之乎。道士曰。此易耳。即令閉門。盡屏侍從。但聞庭中若人馬聲。甚眾。瞬息聲止。閉門視階砌如掃矣。眾嘆服。乘月送之。將別。乃以異人所留木杖授道士。令暫執。道士亦大驚云。杖熱如火。不能執。後不復見。敝後官止衢州。異人亦不復至。年七十六終。

程濟朝邑人有仙術不知何所承授嘗為四川岳池縣教諭地相去數千里旦暮寢食未嘗離家而日治岳池事不廢革除中上書言西北方兵將起當預為之備朝廷以其言妖妄感世繫至京將滇重典濟曰陛下幸且故臣及期無驗就戮未晚也及期靖難師起遂救出之使護軍北行戰於徐州大捷會曹國公師退文皇至江上濟亡命不知所終初徐州之捷諸將立石紀功具載姓名濟夜潛往祭之入莫測其意文皇過徐見之命擊碑一再擊遽曰止止為我錄碑來既正位按碑盡族諸將濟姓名正當初擊處字缺不能辨獨得免曩者之祭蓋穰之也

卓敬字惟恭温州瑞安人卓本瑞安巨姓所居地因名卓奧猶唐之稱杜曲也敬幼警悟絕人讀書能十行俱下過目終身不忘七歲時從羣兒遊有異人過而見之曰此兒滑法非常後日當為名公卿惜血不華色恐不能善其終耳年十五讀書實香山常夜歸遇暴風雨避大樹下水至展轉遷徙晦暝中竟迷歸路遙見林外有大光急趨赴之乃一小院落內有讀書聲敬心稍自慰叩其門有一童子應聲而出曰先生知即君將來使吾候之於此敬仰視其門有大書體玄二字為扁遂相攜而入見一老翁坐長明燈下敬往揖之翁起相勞苦曰深山中昏夜遇風雨得無疑懼乎敬

曰歸省。吾晨昏之常。恐貽吾親憂。雖甚勞困無恨。但得一燭尋路。即可歸矣。翁笑曰。山中那得有燭。但有少枯葉。即君且燎濕衣。徐為之計。敬起解衣。問向童子曰。翁為誰。何姓。童子曰。先生不欲人知其姓。每向人自稱逍遙翁。又問汝何名。曰。吾名少孤。敬疑其為隱君子也。修謹進曰。敬家只在山下。往來山中甚熟。未聞有體玄之院。亦未聞有逍遙翁之名。敢以為請。翁曰。昔體玄先生常居逍遙谷中。吾世業為醫。往來中條山中。後因避難。聞陶隱居有丹室在此。因採藥南來。結庵少憩。不覺遂淹歲月。不久亦還故山耳。又問體玄為何人。翁曰。此吾先世事。即君亦無用知也。頃之燎衣乾。敬又懇乞還家。翁起謂敬曰。即君既不肯留以待旦。吾有一牛。可騎之而歸。昏夜泥淖。當有所恃。無懼也。敬大喜過望。即命少孤牽牛出。又呼一童名少逸曰。汝可將吾舊籠來。就籠中出一僧帽。謂敬曰。既不能留。以此帽為贈。敬辭曰。吾為書生。平生志氣。將期匡濟天下。翁為長者。既蒙訓教。安得以此相戲。翁曰。吾昔亦嘗有志斯世。後因所輔非材。不用吾謀。禍幾不測。得此一籠。始獲解脫。不然。豈復能生出宜秋門乎。即君第收此帽。他日當自理會也。敬堅却之。翁但再三嘆息而已。敬遠窺籠中諸物。悉是籬桶工匠所用。及僧家衣鉢耳。兩童送至門外。敬乘牛致謝而別。方出林

牛行甚駛勢若飛禽。不復能控制。身亦安穩無恐。須臾已及門矣。遙從牛背呼其家。家人已就寢。驚起。隔牆應之曰。夜已向闌。即君安得以此時冒風雨獨歸耶。敬答曰。吾得遇隱君子。借一牛騎歸。不然。今夕必不能還矣。舉火將牽牛入。牛忽抖擻咆哮。化為一黑虎而去。室中人盡震驚而出。比明尋訪體玄山居。不可得。數日後乃在縣西四十里。陶弘景丹室故基旁。有一古廟。彷彿是雨夜所經行者。其壁有潘閔夏日宿西禪院詩。即東坡少日所見。夜涼疑有雨。院靜若無僧之筆也。筆墨猶新。循其路歸。見虎踪。歷歷尚存焉。

按潘閔字逍遙。大名人。通易春秋。尤以詩知名。為王繼恩所薦。太宗召見。賜進士第。尋察其狂妄。追詔罷之。又多出入盧相多遜門下。多遜嘗遣吏趙白交通秦王。閔預有謀焉。多遜敗。宅隨毀廢。閔時方在講堂。巷藥肆中。聞之。知事將連逮。即奔入多遜鄰家。曰。萬無搜近之理。所謂弩下逃箭也。其鄰匿之牆中。閔作詩曰。不信先生語。剛來帝里遊。清宵無好夢。白日有閒愁。捕稍解。服僧服。髡鬚。五更持磬出。宜秋門。變姓名。入中條山。朝廷圖形。下諸路。事之不得。潛居一寺中。題詩鐘樓上。縣令見之。此必潘逍遙句也。命召之。又逃去。投故人阮道時。為秦理掾。諷秦帥曹

武惠上言大宗教其罪以四門助教招之乃出真宗朝王繼恩賊籍其家其中紙題往來詩題滿門事連宮禁上惡其朋結禍將不測閣自疑將逃去京兆尹先收繫獄上聞之詔中外臣僚與王繼恩交識及通書尺者一切不問釋閣罪以為滁州參軍卒泗上

按敬登洪武壬辰進士除給事中遷宗人府經歷建文君登極上疏言燕藩宜徙封內地以消其萌上不聽靖難師起悔之陞戶部侍郎文廟繼統執敬數其罪繫獄將赦之卒以姚廣孝之言不得免禍私謚忠貞

愚謂閣之素行本無足觀其輔虛相之事亦不可與卓忠貞同日語然始末大畧則頗近之豈實香山靈先知聖人之將興憫忠貞忠孝天性假聞事以發公求生之謀乎然閣之生終不及忠貞之死忠貞亦將無憾於地下矣鬼神恍惚難以臆決謹備錄所聞如此

祥符縣人高彥節去家里許有別業屋破敗無人居忽一男子自稱岳嵩寄居其中無行李僕從亦不知何許人也更歲餘周世子聞其人遣使召之不至世子怒令官校圍其居晝日不聞人聲乃破垣入惟聞旁室內有呻吟聲就視之見一人以舊白

布衣覆身。卧顏壁下。創甚。流血被面。瞬息將絕。容貌亦不似嵩。餘屋皆無一物。乃舍之而去。既入暮。嵩忽叩彥節。言世子求我急。欲避之。久賴居停。恨未有以報。就其家求得鐵燭。剪半股。銅筋一枝。置火爐中。閉戶獨坐。良久。從帽簷中出。約一粒粟許。投之。即啟闕出。再拜而別。彥節入視之。二物皆成良金。後五十年。高氏之甥周鏞。為栢鄉槐水驛丞。一日迎官人深山中。遙見嵩戴笠持藁來。鏞猶識之。相對勞苦。問訊如平生。且自言。今已易姓名為丘山。偶尋友經此山中。倉卒別去。已而鏞驚悟。嵩顏色不衰。欲追之。已無及矣。彥節者。高司勳子業祖也。子業有詩紀其事。

劉知府偉。朝邑人。初以鄉舉。令文水。擢御史。所至皆不嚴。而治以厚德稱。父喪。廬墓三年。人稱其孝。生好神仙。比疾病。命其子曰。即死。毋埋葬我。及死。其鄉人有自遠方還者。多從道中見之。寄問及其家。其子因不敢葬。今都御史韓公邦奇。劉氏甥也。獨不信。屢促其子襄大事。子亦未忍違父命。久之。韓公為山西僉事。方視事。忽聞人持偉名紙入報。韓驚起。憲使張公璉問之。韓公備言。舅氏死已久。人傳仙去。某未之信。今通名紙者。即其人也。憲使問狀。閤人言。此人戴古毡笠。青絹絕。一童子扶之。有布囊立門外。遂命延入。從中道緩步而前。韓公遙識之。遽起迎候。於是同僚悉下階揖。

入起居無異平生。但簡言問之。則對坐定。手按茶而不飲。坐中亦莫敢先發言。韓公起。邀就旁室中相勞苦。答曰。久別特速來視汝。語及家事。頗作悲泣之狀。韓留款。不可即起別去。謂韓曰。汝弟邦靖可速令歸矣。出門復攜童子步行去。僚友相視駭愕。令人踪跡之。至一遠寺中止。明日韓公訪之。寺僧曰。昨暮有劉知府寄居方丈中。早言進謁韓公去矣。求之竟不見。邦靖不久養病歸卒。劉氏聞之。發棺視。惟一履在焉。張廉字孟介。湖州人。以都御史鎮雲南。日嘗宿軍中。深夜偶攜燈出。顧見一美婦人在側。遽以燈授之。令前行。遂入帳房。心頗疑懼。取大明律危坐讀之。至五鼓。婦人擲燈而隱。

黃鐘。江陰米商也。有女年及笄。忽為妖所憑。一日以一物遺女。其質類石而圓小如彈丸。謂女曰。此神丹也。人死以熨胸腹上。當復生。自宜寶之。以濟危急。雖父母死。勿妄用也。女謹收之。會其伯母死。女以丹試置屍上。即蹶然而起。若夢覺然。神至怒。謂女曰。何乃妄用神物。遂奪丹去。神亦絕響。

左都御史耿清。陝西真甯人。少赴舉。過淳化縣。宿逆旅。主人有女。夙為妖所憑。是夜妖不至。清旦發。妖即復來。女詰之。答曰。避耿秀才耳。女以聞於父。父追清告之。清書

耿清在此四字。令揭於門。妖遂滅。文廟繼統。清行刺不果而死。

武功伯徐有貞奉斗極誠。每日必北向四十九拜。寒暑無間。閤門不食豕肉。自秘其術。不輕示人。後以罪下制獄。引鏡鑑面。色灰敗。驚曰。吾定不免。乃日拱手默誦所奉斗母咒。又數日。復就鏡。喜曰。吾今知免矣。獄既具。論決之日。風雷大作。承天門災晦。冥中錦衣衛堂上。有物如豕。蹲者七。事聞上。得免死。謫戍金齒。時人疑為斗神也。處士沈周因問請其術。公笑曰。子欲試之乎。公所珮有人髮作一團。束臂上。適庭中有卧犬。公取圍置堂中。指旋左。犬忽若有物。扼其吭者。展轉嗥叫欲絕。指旋右。犬即帖然安卧。竟莫知其何如也。

楊廉夫題臨海王節婦詩曰。介馬馱馱百里程。青楓後夜血書成。祇應劉阮桃花水。不似巴陵漢水清。後廉夫無子。一夕夢一婦人謂曰。爾知所以無後乎。曰不知。婦人曰。爾憶題王節婦詩乎。爾雖不能損節婦之名。而心則傷於刻薄。毀節義其罪至重。故天絕爾後。廉夫既寤大悔。遂更作詩曰。天隨地老妾隨兵。天地無情妾有情。指血齧開霞嶠赤。苔痕化作雪江清。願隨湘瑟聲中死。不逐胡笳拍裏生。三月子規啼斷血。秋風無淚寫哀銘。後復夢婦人來謝。未幾果得一子。

李茂元字惟大洛陽人初名源其師曰昔省元有同姓名者其父曰然則名茂元何如其師復曰此亦近歲本省發解第二人名也父曰豈以二人故至廢名耶遂以茂元名後果亦鄉試名第二正德辛巳登進士拜行人嘗使陝浴於故華清宮溫泉其池中石座上有紅斑文俗訛傳為楊妃入月痕也茂元見之心動浴罷登輿幃帷外有一婦人手熟視之忽不見夜宿公館有婦人至容貌絕世而肌肉頗豐自稱太真言君一念所及幽冥相感不能忘情遂感之自是輒迹所歷每夜必至百方遣之不能去心志喪亂以疾告歸久之方絕歷南京戶部郎終陝西僉事

毛孔域福清人嘉靖乙酉正月朔旦出賀節於親友中途顧見其家樓中有一婦人越窗登樓脊身坐紅被上心異之馳歸召其二子驗視無所見樓亦扁鑰如故其年子秉鐸領鄉薦名第十八明年登進士第

正德戊寅五月十五日有龍見於余邑西北自大壑橋東入於海所經民居牛馬柱礎確磨之類悉飛蕩空中如燕雀凡林木雖聯抱性脆者中絕堅者株拔莫有免者人徒步遇之或數里而墮在舟中遇之併舟飄舉或數十百步而後墮烟雲繚遠天地晦黑掣雷中見一白龍目如雙炬玉光閃爍蟠亘無際前有二黑龍差小若導之

者。然自後霖雨凡五晝夜不止。江南災人有遇之而墮者。自言如在夢中。初不自知也。有僧結一佛堂在水之南。僧偶出。雨霽僧還。乃徙在水北。壁落如故。封鑰宛然。此尤可怪也。守臣雖嘗具奏。而未盡其變怪之詳。此亦特其畧耳。

常州府城北數里。地名石柱頭。富民范廣。死數日。忽自外來。家人初不信。呼為妖怪。廣厲聲叱之。舉其死後數事。訓戒其妻子。各有實據。始悉伏罪。因薦酒肴。雖見廣飲食之狀。而物不加損。人近之。則屢却。不能及其身。雖妻子亦令勿親我。餘與生時無異也。自是日坐廳事。處分家事畢。即忽不見。及舉其喪。凡葬埋餽奠。亦自臨之。一日謂其子曰。明日吾有小事。詣武進縣。有公差二人至。汝可預備錢二百為贈。慎勿多與。其子如教。明日果有二卒來。子述其事。卒不信。益錢至四百始去。中途遇廣。謂曰。吾囑吾子。宿具錢。足備二子取酒之費矣。奈何欺幼。推多取索耶。欲挽二卒還。卒懼棄錢水中走。自是內外悚畏。盜賊不及其門者數年。家以大治。久漸不見。舉人陳瓊舊嘗主其塾。聞其事。往訪之。隔座舉茶杯曰。幽明相隔。不能親奉也。予正德丁丑下第。與瓊同舟南還。言之甚詳。

李通判一寬。邑人也。宅故多怪。一日會客滿堂。余先大夫亦與焉。方行酒。忽眾客巾

帽一時皆自脫上附梁棟左右飄蕩如飛鳥客皆習知不懼也獨先大夫冠如故因拱手祝曰。主人以好會客。吾輩固莫測汝為何等神怪。使汝為邪祟。不宜侮弄君子。若正神也。奈何以冠裳為戲。祝已。巾帽一一各復本人首。如肅整者。及于舅氏湯潤。一日雨中遣使至其家。置傘於門外而入。言事於堂上。語畢出。取傘。則已失矣。遍求之。不獲。更歲餘。其家一故櫃。封識已數年。偶發之。傘在焉。展轉取之。不能出。斷其柄。始能出之。

高坡吳纂卷上終

明 常熟楊 儀夢羽著

誠意伯劉基少讀書青山中。忽見石崖豁開。公棄手中書亟趨之。聞有呵之者。曰。此中毒惡不可入也。公入不顧。其中別有天。見石室方丈。周遭皆刻雲龍神鬼之文。精妙可愛。後壁正中一方白如瑩玉。刻二神人相向。手捧金字牌云。卯金刀。持石敲公喜。引巨石撞裂之。得石函。中藏書四卷。甫出壁合如故。歸讀之不能通其辭。乃多遊深山古剎。訪求異人。久之。至一山室中。見老道士憑几讀。公知其隱君子也。再拜懇請。道士舉手。書厚二寸許。授公。約旬日能背記。乃可授教。不然無益也。公一久至其半。道士嘆曰。天才也。遂令公出壁中書。道士覽之。笑曰。此書本十二卷。以應十二月。分上中下。以應三才。此四卷特其粗者。應人事耳。乃閉門講論。凡七晝夜。遂窮其旨。公拜請益。道士笑曰。凡天人授受。因材而篤。力薄而任重。鮮不仆矣。昔子房孔明。並得其六。予得其八。子今得其四。亦足以澄清濁世矣。若夫窮神知化。出有入無。此天地之玄機。造化之至理。天固不輕畀於人。人亦豈得而輕相授受哉。遂別去。後公佐高皇帝定天下。問語及道士。驛召至闕下。年八十餘矣。時方議建宮闕。令道

士為圖以進。與誠意伯張鐵冠所進圖悉合。詔欲留備顧問。答曰。劉基天資過臣。臣學且悉。傳基無庸留臣也。終不奉詔。放還山。不知所終。或謂道士即九江黃楚望也。又公為高安丞。聞縣人曾公有奇術。往師之。得異書甚多。銀河棹亦其一也。其中載天文最悉。今傳世者恨不全耳。

丘文莊公濬。初與戚編修濶字文湍同館。友善。戚公以母喪歸。所居在餘姚縣長亭港。服闋將入都。夜過陞山橋塔子嶺前。遙見燈燭人馬夾岫而至。戚公方醉寢舟中。人告之。戚公起推蓬謂之曰。君等為迎我來者。即當前驅。不為迎我來者宜自散去。一時所見恍惚皆前行。既遠漸不見。戚公至錢塘。疾作死。杭有神降。自稱戚編修。死為錢塘潮神。人敬祀之。弘治甲寅。瓊山夫人吳氏至京師。道出鄱陽。夜夢戚揖之。且告以來。曰。將有風波之厄。戒勿行。比明。天極晴朗。夫人故以他事緩之。同艤之數十舟。行無何。皆遇暴風雨。漂沒。獨夫人舟無恙。至京以告公。公為詩。文遣官齋御酒香帛至浙江。屬布政使李贊望錢塘祭之。其詩曰。幽顯殊途隔死生。九原猶有故人情。曼卿真作蓉城主。太白常留翰苑名。念我明明來入夢。哀君惻惻每吞聲。朝回坐對黃封酒。悵嘆雞壇負舊盟。其序曰。文湍先生。別我去也。二十餘年矣。夫人鬼殊途。於

故人妻子尚有憐顧之意。况生為人半。余因老妻述其夢中所見。感嘆者久矣。曰。不但今世無此人。亦未聞古有此神也。古詩有云。莫憑無鬼論。終負托孤心。予愧於君也多矣。故投淚書此八句。以達之君。神遊八極。幸勿笑曰。我不識世間人。作何等語。雖然。余年踰七望八。在人世幾何時哉。冥冥之中。相見蓋有期也。明年乞骸南還。道錢塘江。求一帆風以相送。不知肯於夢中一會晤否耶。其祭文畧曰。嗚呼文湍剛勁之姿。英邁之氣。高義弘達。直上薄於雲天。巨眼空濶。每下視夫塵世。老妻南來。舟次江滢。夢中彷彿如見。告以風波將至。既而果如所言。卒免顛躓。人傳君之為神。溢胥濤而享祀。即其所至而徵之。母乃兼司夫江湖之事云云。明年公薨。夫人扶柩歸。經錢塘。時替猶在任。仍設祭江滢。以戚公配享。

東溪先生楊浩然。諱集。髻戲時。父穀堂徵士。諱宗。字叔振。命早過鄰家黃氏。其家門尚未啟。從門外呼之。有一人聞扣門聲。閤中呼先生。將與語。先生心懼不應。急扣而入。論事畢。天已明。黃氏子式送出門。其人猶在。注目良久。問曰。汝為誰氏子。旁人謂曰。楊姓。其人曰。惜哉。吾聞其聲。法當位極人臣。名滿天下。故竚立伺之。今觀其貌。與聲不稱。後日官亦至五品然。其聲洪遠。當獲福宏長。不在其身。子孫必有興者。又謂

黃氏曰。此兒亦不凡。位當七品。言畢竟去。徵士聞其事。遣人追訪之。其人乃袁忠徹也。東溪先生年十八。為縣學生。嘗齋詔至福山。巡司例有款贈銀五兩。同行者又二人。皆長年庠友也。盡取之。止以款筵食品送先生。先生以二人皆前輩。口雖不言。而心甚不平。其地濱江。還向江獨步而去。二人疑先生有後言。徐躡聽之。先生至江濯手。欣然笑曰。巡司齋詔。豈吾志哉。願此輩常享例贈矣。二人竊聞之。從後遽推先生入水。先生兩手下拒。入沙土中。持一物起視之。乃銀一錠。此銀入水。久為波浪洗。嚙光潤瑩白。傳玩可愛。適與巡司贈禮輕重相符。人共駭異。釀酒臨江。歡燕而別。後先生以景泰五年會魁。及第。觀政兵部。以章綸鍾同事。上書言之。進一級。除安州知州。後亦下制獄去位。我朝進士五品出守自此始。壽七十八。終黃式。以歲貢官至知縣。忠徹神鑒並驗云。

趙涓。甯波人。其姑少從諸女郎入山中遊。人跡既遠。忽遇二女子在松下對奕。趙就問之。二女子稍為指示。行子侵綽。聯斷之說。初亦不知。奔為何事也。歸以告其父母。心異之。從親戚家借得棋子試之。又無人可與為敵。乃以意授兄子涓。涓僅得其概。數日間名著郡中。雖素號國手者。對涓便縮數子。當時鄞人樓得達。江陰相子先皆

以棋知名。得入供奉憲廟。初涓至京。併召入與二人弈。每以金盛賞銀。多少無定數。勝者叩頭啟盒取之。二人連日不能勝。夜出私叩涓曰。吾以棋取上寵。願今君累勝。名已著矣。若數局不一復。且將得罪。計上盒子中賞銀雖多。不過三兩。今願以銀一錠為君壽。乞詐欺以示與君能相上下。涓許之。明日入樓先對局。涓詐欺樓叩頭啟盒。中乃補錦衣百戶空名御札。及一牙牌也。帝初意欲官涓。涓竟不得。帝嘆曰。孰謂天子能造命哉。卒官樓。後范洪亦得涓分數。視涓姑高下。益懸絕矣。

李汝省。南昌人。初為小吏。至都下。以雷法動憲廟。與僧季曉同被寵幸。汝省為太常。日有御史巡按江西。將行。汝省囑之曰。吾壻龔正弼。鄉人皆以掄魁擬之。歲當大比。幸為屬意。御史許諾。凡各省秋試臨場。巡按察院例有堂考。遂以正弼名置第一。實為秋闈地也。至初場。正弼不至。御史遣人傳呼於門。門吏追訪於其家。畧無踪跡。至巳刻。始鎖院降題。迨二場日將晡。正弼忽自外歸。家人驚喜問之曰。吾攜卷赴院時。有數人相持而行。心志昏憤。送入城隍廟。置我於神像後。耳目聞見。無異平生。心亦了了。神前祈禱之人。其語言一一皆能記憶。晨昏鐘鼓亦悉聞之。但口中不能言。手足不能動耳。吾竊計今日已過二場。默禱求歸。遂脫然能行矣。乃知國家之事。莫重

於進用賢才。當自有鬼神司之。豈一奸邪小人所能干撓哉。初。孜省喜房中術。又能巧為淫媒之具。惑人。及以雷法進侍。上於內禁建立皇壇。二人得日入誦經禮神。寵渥既深。權傾一時。弘治初。孜省雖已伏誅。而壇內供用物料器具。久猶未除。弘治五年六月初四日。戶科給事中叢蘭。河南道御史彭程。會本言其事。蘭疏奉旨。造作皇壇家火。併支給工價數目。着光祿寺便查來看。該部知道。程疏奉旨。先帝被李孜省等所誤。事已往了。這御史却又歸咎先帝。錦衣衛拿送鎮撫司。好生打着問。二疏同時一事。而批答迥異如此。亦甚異也。

先大夫諱躬為莒曰。莒小吏尉王家產一馬。白色騮也。州常有公事。欲申青州府。去州三百六十里。事急莫可遣者。王自陳有良馬。一日可達。遂遣之。行數十里。有郡盜見玉馬。邀之。玉給曰。固吾願相易。然馬有良駕。請先試之。於是郡盜馬與玉馬並發。未數里。玉馬前至一村巷。出公文示村民曰。吾莒吏也。有羣盜欲奪吾馬來避於此。民匿之。俄而盜至。將盡殺村民求馬。玉知盜在外殺人。策馬越數重牆出。直走府中。日尚未午。至是馬名大著。先大夫以重價取之。每有事白府。則一日能往返。後歸吳中。死廐下。又常修莒城。莒民馬良得一瓦函。上並列二穴。一穴有水。清徹無滓。一穴

有一劍良持歸置榻下。夜有光洞照一室。乃以紙布裹數重。繩遠其外。光如故。明日視之。布繩皆兩離。劍脫刃而出矣。良懼。掘地理之。嘗持示余。余時年甫十歲。不知其奇也。後莫知所在。

唐文。字儀卿。上世華州人。徙居河東。文少從父宦城陽。城陽君初無子。晚獨生文。然性質魯鈍。日課讀唐人五言詩二十字。師口授數十百過。令自誦。即茫然不能舉。一辭。城陽君怒。日撻之。不能進。乙卯歲。延庠生章敬教之。敬患文魯鈍。托以秋將大比。請入定林寺溫習故業。定林寺者。去城陽西十五里山中古寺也。前有大樹巨圍。陰蔽數十畝。蓋勝境也。城陽君遣文從行。是秋敬下第。九月未望。一日再至寺。文以父命邀敬還。初文之從章讀書寺中也。寺故有梓潼像。頗著靈異。士子多來祈請。文旦暮焚香拜禮。乞稍慧。以全父子之愛。是日早食畢。文獨出坐樹西石床上。見有美女子從樹東來。意甚閒靜。文問之。女曰。予文曲輔星之精。子之配也。文不省。女又曰。今世人所共見七星旁。各有一小星。文曲旁小星。即吾也。子即文曲星之精。往者歲在戊申。紫微初御世。土氣掩斗。故子蒙塵下謫。今蓋八載矣。凡貴星有謫者。法當聰慧。大魁天下。位極人臣。子孫滿前。出入殿陛者。多至五六十年。少亦不下三四十年。

但子于下謫時。值牛女交會之日。潛窺天漢中戲狎之象。又愆期五百九十刻。被訴於天帝。天帝大怒。減福之半。故暫令子魯鈍。不出三四年。復本性矣。文亦不省。謂女子曰。何物二人。能令吾不慧。傷吾父子。吾且必報之矣。女子笑曰。子真所謂下愚者。彼天神耳。子今下謫塵世。將奈彼何哉。雖然。無庸報也。疇昔之事。有犯塵緣。亦終與子會矣。方子潛窺時。天孫誤以子為牽牛。攬子衣渡河。天帝知而醜之。亦謫塵中。天孫謫時。執牽牛手。不忍別。帝又大怒。以為牽牛。懲天孫。批其頰。傷左眉中。血流被體。併謫牽牛矣。特貫索躔牛女度。當緩十六年。乃發。又牽牛法不得同行。後天孫一載耳。文曰。然則汝為少婦。行空山中。將何為。女曰。吾不見子久。請於天帝。即得下從子矣。然山中秋氣早肅。得無寒乎。口中吐五色雲。手捧雲掣拽之。成錦帔。長丈餘。輝光燦爛。覆文身。視之目眩。忽女子上樹杪。文驚異。呼寺中人出。共觀之。已不見女子。惟見彩雲南飛。隱隱如聞音樂之聲。章備記其事。及為長歌刻石寺中。已上皆徵文後事。長歌石已毀。不能復記。先大夫遵毅府君為官守。曰。猶及見其抄本。以下並得之。土民相傳。文後果大開悟。文名傾海內。年二十三。前夫人錢氏死。明年再娶于清河張氏。少文七歲。問其生。即見神女時也。心異之。又五年而發解。又十年而登進士。以使事攜家屬入吳。其冬北還。至毘陵。水合。舟不能進。乃舍

舟陸行道中見一童子稱牛即願自繫文遂攜之以北牛即事文甚謹文撫之殊厚若其子易其名曰壽安久之自言有家禍請暫歸省文曰而縣尹武元功吾同年友也吾為若致書與尹尹當有以處汝矣遂發書遣歸文夫人在毘陵為文置一妾名玉英其慧麗冰解偕行至京文亦寵之先是元功為尹政令嚴肅部中有胡氏子名朝者負官緡亡去親戚皆逮繫事連其婦兄成進進曰吾妹尚未有行朝自甲申夏竄歷五年矣奈何事及我辨於縣尹遂判牒付進許其妹別嫁朝歸以書進尹尹初欲脫朝罪或說尹曰朝妻公已判別嫁矣若脫朝朝必求故妻於進是公吐權貴而貪牒辭也有二失焉尹以為然遂正朝罪流陝州文之再入朝也又使山東將行時微聞其妾有夫囑夫人使訪其親戚還之文行適夫人母死弟幼莫恃以為葬遂攜妾還河東思還妾計無由求妾親戚欲得南士人嫁之時朝既流關內間遊河東唐公僮僕中無識朝者朝亦無由見夫人獨媒氏知朝與妾同鄉里卒嫁與之歡會之又各道鄉邑父母姓名妾即進妹朝前所聘妻未行者也相向悲泣明日俱至夫人家陳謝願服勤至死文歸因詰壽安者即朝其生以乙丑牛為丑神故小字牛即妻又果先牛即一年生朝之初竄時又怒其以斧傷右眉間痕固在焉乃私嘆天人之際

雖若玄穆而兆命不渝。章敬石記。悉有徵焉。文諱言其事。使山東時。自毀其石。故時罕傳焉。

陽永貞吉。水人精易卜。成化末。其縣有商人將貿易蜀中。求卜於允貞。允貞曰。是行也。遇不測之險。獲無窮之利。商人素熟西南諸夷。囊中有利劍。以爲淬之。佩以自衛。所經蜀中一山。多豐蛇。猛獸百二十餘里。無居民。行且半。見一巨象伏大樹下。若有所畏者。遙窺之。樹上有巨蟒。張口吐舌。舌長數尺。將下吞象。商人巨甚。自度進退無所據。乃挺劍直走樹下。仰斫蟒。數刃急趨避之。蟒初若不知。須臾聞有聲。若山摧谷應。林木皆震。心喪力殫。頽然倚石。顧盼間。則蟒舍象來逐。僅隔數十步。藥發而斃。良久。又見象來漸近。商人計莫能脫。遙指叱象曰。汝阨巨蟒。吾脫汝蟒口。而顧困我耶。象進伏商人前。雙淚並落。若有叩謝之狀。商人會其意。坐象背上。象即走山谷中。以鼻掘地。有蛻牙無算。商人盡取以歸。遂成富翁。

成化中。濟甯城東古木深巷。破屋二三間。一老人居之。日惟啖粟數枚。或菜數莖。飲水而已。人見之。已數十年。白髮被頤。肌膚瑩白如少壯。初不知何人也。濟甯有指揮王宣。往見之。問其姓名履歷。自言我王士能也。本海州人。生元至正甲辰。少慕神

仙入蜀。聞雪山有異人。往求之。見一人披氈卧山洞中石床上。身三尺餘。僅如嬰兒。座側懸一囊。中有物如粉而色黑。時取啖之。或掬飲澗水。士能以囊中物苦澀不能入。拾山果食之。執役左右。三年不懈。老人一旦謂曰。子可以語道矣。遂授以攝生煉氣之要。學既成。辭出居。此忽復一周甲子矣。不久亦將往訪之耳。宣大驚曰。吾固海州人也。聞吾祖言。上世有叔祖名士能。好道家。得無是乎。又問家世之詳。言悉與宣世譜合。由是居人信慕。往來使客。尊官貴人多就見之。事聞朝廷。命守臣具安車送。入京師。召見便殿。賞賚甚厚。遣歸。不知所之。

正統戊辰。寶坻縣民周本家馬生一角。長二寸。本縱逸之。明年己巳八月八日。太陽將入地。猶有餘照。金星見於月中。月色淡而星光甚大。時車駕北征未回。至十五日。遂有土木之變。景泰中。先大夫知安州。以事至寶坻。問生角馬何在。本言虜騎至驅之北去矣。

鎮蜀太監李文中還京師。偶會皇甫子中。裘汝溫。巫汝功於途。三人皆楚之英俊。文中一見。極加禮遇。聯舟同行。至采石。有衣生者。自稱蜀人。攜一弟二姪。詣三人舟中。求附儀文。俊雅情辭。款曲三人皆自失。遂令攜行李入舟。其長曰。幼兒無知。誤犯鎮

蜀李監。今李公還京。檻付舟中。將順途。哀懇冀全餘生。倘不見憫。一度長淮。風土失宜。父子兄弟。便無全理。前所附舟。至此已泊。訪之鄰舟人。知三君高義。雅為李公所重。或幸以此脫吾兒耳。言畢。潸然淚下。率弟姪羅拜。三人皆為之動容。憫之曰。李公雖粗相識。然亦未知賢郎事體。未審重輕。俟緩圖之時。傾重九天。猶未晚。因共步於江岸。見長林中有一亭。甚幽絕。欣然同造。命舟人具酒。有亭主人亦攜一友至。將行酒進。肴核。袁生起曰。堂上有老母。舟中有罪兒。我輩遠來。皆戒肉食。祈福若賜菜果。則可。若魚肉也。則請辭。恐重得罪。不敢預告也。子中笑曰。孰謂敏達俊爽如四子。亦信奉夷鬼教耶。歡飲之。次月色在地。情興悠然。汝功請各賦詩紀勝。主人遽起曰。吾二人皆賤商。幸遇貴客。得廁坐隅。若酒肴則請傾囊奉歡。詩固不能也。家有故書。頗揭韻。佐成諸君新篇耳。眾又大喜。命其僕持一冊書至。乃杜律也。主人起對客一舉。得送李八秘書七言。以首句青簾白。益州府君家諱益州來為韻。汝溫笑曰。主人出韻中事。固高才也。孰謂南豐不長韻語耶。袁得青字云。月華映袍碧。江影度帆青。次子中得簾字云。夜色月萬傾。秋香風一簾。次袁生弟得白字云。藉子黃金杯。寒江弔李白。次汝溫得家諱云。開尊集羣英。伐鼓移官臈。次袁氏長姪得益字云。豈謂萬里途。邂逅

迨逢三益次姪得州字云迨迨出采石鬱鬱見黃州最後次汝功得來字云蜀船三峽來兩岸猿聲哀陳未竟四表生皆色動起曰咄咄逼人乃爾遂去不復顧諸客大驚愕道留之叫嘯入林薄中不知所往乃詣李監船問檻京師罪人袁氏無所得獨前舟有一猴子在阱中三人歸舟發其行李惟橡栗三篋而已共詣李詳言其事李監憫然開阱縱之

南京王指揮敏初無子以運糧把總至京過濟甯買一妾色美而賢內外宗姻咸敬愛之生一子未幾夫與正室相繼死妾治家教子極有法度既而子襲官復為把總部運北上懇請其外家所在但言嫁時年幼已忘之矣妾之歸王氏者三十餘年早起必梳沐於榻上幃幙中至老愈嚴肅子婦晨省立于戶外伺其自出然後敢前謁拜近侍有二婢亦未嘗見其梳沐也一日晨興頗遲二婢立榻前忽風動帳開乃見一無頭人坐帳中持髑髏置膝上粧飾猶未竟見二婢倉皇舉髑髏加頸不及身首俱仆婢驚呼子婦入則固一枯骨也人因呼其子為鬼頭王

江西副使周憲字時敏湖廣安陸州人正德六年贛州華林山馬騰巖賊亂周與參將趙越督兵捕之南昌府知府李公承勛時以他事偶至贛聞土人陳枚善以符水

召將言未來事甚驗。其法作符咒畢，鎖筆硯於空室中。須臾聞閣筆聲，開扇視之，則紙上詩成矣。讀畢，即投諸火，不許留一字。周趙二公召枚至，招李夜會，初亦不甚信也。但密置紙筆於東室，而封識枚於西室。三人夜張燈宴于中堂，周善笑，謔浪恣肆，略無敬禮。其夜天無纖雲，忽震雷擊紫庭，燭盡滅，盃盞皆中裂，三公辟易而起。枚從西室排戶出，暗中伏地請罪。啟東室視之，紙上但有周鑰如何好笑六字。因共敬禮，各書姓名，封憲如故，而修謹以伺。周公求得詩，落白云：千金難買汝心肝，未幾周遇賊，同其子幹策馬以進，為士卒先。大戰於桐梓嶺，援兵不至，為賊所擒，父子俱死，剖食其心。賊既平，李公復求詩於紅紙上，作字甚佳。李公欲收其筆，因以別紙色似者對枚付火，而以詩紙密藏書帙中。明旦忽書中烟起，發視之，惟紙灰一幅，宛然書無纖毫熏灼痕也。周既死後，有以其事奏聞，謚節愍旌其門。

嘉靖初年，靈壽縣民劉月家雄雞生卵，縣令不肯信，縛雞至官衙，晚亦生一卵，但殼軟耳。嘉靖七年七月十五日，其縣雨雹，大者如牛頭，小者如杯盤，有人拾得二雹，正如鷲卵，積數日不消，置水中不沉，觀者日眾，縣尉不能禁，遂擊破之，其中皆水，更無他異。

成化間河南省下有漁人得一龍卵於黃河邊葦箔中大容一升許有一商人以數尺布易之送於官置諸延慶觀居民異之觀者如堵時盧龍周斌字國用知開封府命擊破之中包碧水餘無所有數日後忽大風揚沙黑雲自觀中起勢甚猛庭前有兩樹都司前一大樹皆拔去左布政章繪宅內有樓飄去其半樓上有一大銅盆亦從空飛去

正德三年夏旱予邑大和里農人皆灌苗於野日在未申忽有雲從西來冉冉漸近雲中有紫袍人乘白馬而行馬足半以下雲擁之不能見人皆喧呼從之雲中人回顧良久漸至虞山頂滅又王秋官惟賢四川人自言嘗見兩翁駕鶴而飛於雲表東西相遇各駐立下鶴而揖偶語良久乃去

嘉靖二年邑庠生呂王家五渠村端陽日入城值微雨其家前庭有廢屋基忽雲中二舟各長丈餘墮發基上行舟人皆長二尺餘紅帽雜色襦袴手持篙往來行甚疾王家塾中書生十餘人悉驚趨視之紅帽人擲篙走地上引手前掩書生口一時口鼻皆黑噤不能語返走室中避之從窗隙窺見舟中有一人擁衛如尊官結束如居士與一僧同起居自推蓬左右顧盼雲漸擁舟起牆外里許呂氏墓也復墮其中舟

既去書生口鼻亦悉如故方共駭異。玉歸聞之持鎗入墓中。無所見。越五日。玉以暴疾死。

高坡異纂卷下

明 常熟楊 儀夢羽著

于子仁。湖廣武岡州人。有雋才。多異術。舉洪武乙丑進士。厯官知登州府。部內有虎患。遣卒持牒入山焚之。明日虎自入府。伏庭下。子仁數其罪。杖百下。厲聲叱出之。虎復循故道去。或以妖術聞。詔下子仁獄。數日。瘐死獄中。棄其屍。忽夜歸家。家人悉以為鬼物。閉門拒之。子仁自言。吾時在獄。實逃出。謂死詐耳。門內人多方辨驗。無他。始納之。後居家不自韜晦。日與故舊遊宴。或泛舟逆水而上。不用帆櫓。或音樂供帳。無人自具。以此為樂。其仇家劉氏繫之。白知州伍芳請奏聞。芳不從。劉自詣闕告之。命官按狀。未至州。一日。失子仁所在。惟遺鐵索而已。劉竟坐欺罔死。子仁自號七十二峰道人。父嘗為梓人。或以子仁為梓人。訛也。詞翰清妙。人多有藏之者。

新建伯初被謫。至杭。寓勝果寺。恐逆瑾議其後。托投江死。留題于壁。其序畧曰。予餘姚王守仁也。以罪南謫。道錢塘。以病且暑。寓居江頭之勝果寺。一日有二校排闥而入。直抵予卧內。扶余而行。有二人出自某山蒙茸中。其來甚速。若將尾予者。既及。執二校。二校即挺刀厲聲曰。今日之事。非彼即我。勢不兩生。吾奉吾主命。行萬餘里至

謫所不獲。乃令得見於此。尚可少貸。以不畢吾事耶。二人請曰。王公今之大賢。令死忍下。不亦難乎。二校曰。諾。即出繩丈餘。令予自縊。二人又請曰。以縊與刃。其慘一也。無已。令自溺。江死何如。二校曰。是則可耳。將予鎮江頭空室中。予從窗謂二人曰。予今夕固決死。為我報家人知之。二人曰。使公無手筆。恐無所取信。予告無以作書。二人則從窗隙與我紙筆。予為詩二首。告終辭一章。授之。以為家信。詩曰。學道無聞歲月虛。天乎至此欲何如。生曾許國慙無補。死不忘親恨有餘。自信孤忠懸日月。豈論遺骨葬江魚。百年臣子悲何極。日夜潮聲泣子胥。其二曰。甘將世道一身擔。顯被天刑萬死甘。腹滿文章方有用。百年臣子獨無慚。涓流裨海今真見。片雪填溝舊齒談。昔代衣冠誰上品。狀元門第好奇男。其告終辭曰。皇天茫茫降殃之無憑兮。宵莫知其所自。予誠何絕於幽明兮。羌無門而生訴。臣得罪於君兮。無所逃於天地。固黨人之為此兮。予將致命而遂志。委身而事主兮。夫焉吾之可有。狗聲色以求容兮。非前修之所守。吾豈不知直道之殞軀兮。庶予心之不忘。定于志詎朝夕兮。孰顛沛而有忘。上穹林之杳杳兮。下深谷之冥冥。白刃奚其相向兮。盼予視若飄風。內精神以淵靜兮。神氣泊而冲容。固神明之有志兮。起壯士於蒙茸。奮前持以相格兮。曰孰為事刃。

於貞忠。景冉冉以將夕兮。下釋子之頽宮。曰受命以相及兮。非故於子之為攻不自
盡。以免子兮。夕予將浮水於江。嗚呼噫嘻。子誠愧於明哲保身兮。豈效匹夫而自經。
終不免於鴟夷兮。固將逝江濤而長征。已矣乎。疇昔之夕子夢坐於兩楹兮。忽二倅
來予覲。曰予伍君三閭之僕兮。踞陳辭而加璧。啟緘書若有覲兮。恍神交於千載。曰
世濁而不可居兮。子奚不來遊於溟海。鬱子懷之怵愴兮。懷故都之拳拳。將夷險惟
命之從兮。孰君親而忍捐。嗚呼噫嘻。命苟至於斯。亦子心之所安也。固晝夜以為常
矣。予非死之為難也。沮陰壁之岑岑兮。猿狖若受予長條。虺結蟠於圯垣兮。山鬼弔
於巖噉。雲冥冥而晝晦兮。長風怒而江號。頽陽條其西匿兮。行將赴於江濤。嗚呼噫
嘻。一死其何之兮。念層閭之重傷也。予死之奄然兮。傷吾親之長也。羌吾君之明聖
兮。亦臣死之宜然。臣誠有憾於君兮。痛讒賊之諛使。構其辭以相說兮。變黑白而燠
寒。假遊之竊辟兮。君言察彼之為殘。死而有知兮。逝將訴於帝庭。去讒而遠佞兮。何
幽之不贊於明。昔高宗之在殷兮。賚良弼以中興。申甫生而屏翰兮。致周宣於康成。
帝何以投讒於有北兮。焉能啟君之衷。揚列祖之鴻庥兮。永配天於無窮。臣死且不
朽兮。隨江流而朝宗。嗚呼噫嘻。大化屈伸兮。升降飛揚。感神氣之風霆兮。溢予將反

乎帝鄉。驂玉虬之蜿蜒兮。鳳凰翼而翱翔。從靈均與伍胥兮。彭咸御而相將。經申徒之故宅兮。歷重華之陟方。降大壘之茫茫兮。登裂缺而愬予。懷故都之無時兮。振長風而遠去。已矣乎。上為列星兮。下為江河。山岳興雲兮。雨澤滂沱。風霆流形兮。品物咸和。固正氣之所存兮。豈邪穢而同科。將予騎箕尾而從傅說兮。凌日月之巍峩。啟帝闕而簸清風兮。掃六合之煩苛。亂曰。予童顛知罔知兮。姿狂愚以冥行。悔中道而改轍兮。亦俛俛其焉明。忽正途之有覺兮。策予馬而遙征。搜荆其獨往兮。忘予力之不忍。天之喪斯文兮。不畀予於有聞。矢此心之無諉兮。覽予將求於孔之門。嗚呼。已矣乎。復奚言。予耳兮予目。予手兮予足。澄予心兮。肅雍以穆。反乎大化兮。遊清虛之寥廓。詩下有隙紙。篆書自註云。二人一姓沈。一姓殷。俱住江頭。必報吾家。必報吾家。紙尾又有篆書云。陽明公入水。沈玉殷計報。是歲正德丁卯仲秋。當三試之後。舉子畢集於杭。一日忽失王公所在。舍人見所寓僧舍壁上。有二紙。或又得其雙履於江上。以為真死矣。告諸其弟伯敬。因而省中皆聞之。執僧四出追訪。士子聚觀前詩辭。隨毀於眾人之手。有一士子與其弟同舍。見之最先。故得全錄其辭。並得二詩。其序則但一過目。不及畢錄。而羣手至矣。前序畧蓋寫其意。予為點竄數字。令成文可讀。今

人止能知其前詩一首餘並不復知也。王公七日後至廣信府。自言入江有神人救之。一日漂至漳州府境登岸。有中堂主人邀歸山室中。贈以詩曰。十五年前始識荆。此來消息最先聞。君將性命輕毫髮。誰把綱常重一分。寰海已知誇令德。皇天終不喪斯文。武夷山下經行處。好對青尊醉夕曛。公自言從漳至廣信。所經寺觀驛舍。皆有留題。其說甚奇。人頗知其意。不復細驗也。又公記夢詩并序併附入。

正德庚辰八月二十八日夕。卧小閣。忽夢晉忠臣郭景純氏以詩示予。且極言王導之奸。謂世之人。徒知王敦之逆。而不知王導實陰主之。其言甚長。不能盡錄。覺而書其所示詩於壁。復為詩以紀其畧。嗟。今距景純若干年矣。非有實惡深寃。鬱結而未暴。寧有數千載之下。尚懷憤不平若是者耶。

秋夜卧小閣。夢遊滄海濱。海上神山不可到。金銀宮闕高嶙峋。中有仙人芙蓉巾。顧我宛若平生親。欣然就語下烟霧。自言姓名郭景純。攜手歷歷訴衷曲。義憤感激難具陳。切齒又深怨王導。深奸老猾常欺人。當年王敦覬神器。導實陰主相緣夤。不然三問三不答。胡忍使敦殺伯仁。寄書欲拔太真舌。不相為謀敢爾云。敦病已篤事已去。臨哭嫁禍復賣敦。事成同享帝王貴。事敗仍為顧命臣。幾微隱約亦可見。世史掩

覆多失真。袖出長篇再三讀。覺來字字能書紳。開牕試抽晉史閱。中間事迹頗有因。因思景純有道者。世移事往千餘春。若非精神果有激。豈得到今猶憤嗔。無成之語以筮戒。敦實氣沮竟殞身。人生生死亦不易。誰能視死如輕塵。燭微先幾炳易道。多能餘事非所論。取義成仁忠晉室。龍逢冀勝心可倫。是非顛倒古多有。吁嗟景純終見伸。御風騎氣遊八垠。彼敦之徒草木奠土臭腐同沉淪。

晉忠臣郭景純自述詩。蓋予夢中所得者。因表而出之。

我諳陽明道。故知未來事。時人不我識。遂傳耽一技。緬思王導徒。神器良久覲。諸謝豈不力。伯仁見縊底。所以敦者備。罔顧天經與地義。不然百口未負托。何忍置之死。我於斯時知有分。日中斬柴市。我死何足悲。我生良有以。九天一人撫膺笑。晉室諸公亦可恥。舉目山河徒嘆非。攜手登亭空洒淚。王導真奸雄。千載人未議。偶感君子談中及。重與寫真記。固知倉卒不成文。自今當與頻謔戲。倘其為我一表揚。萬世萬世萬萬世。

張金箔。山西人性機敏。山西俗素不善治金箔。張至杭見之。歸擅其藝。常經行濟源。觀於神祠。神素號靈異。能隨人意所需。即自水底浮出。張笑曰。此伏機耳。非神也。歸

鑿池設機神異悉如濟源。客至輒引為戲。忽有道士來遊池上。因曰。吾亦有小術請試之。君宜過我。張許諾。明日天未曙。有二童子乘一龍。手控一龍。從空中下其家。言道士令我二人召張君。張就龍欲乘之。龍不服。騰驥吼嘯。勢將飛變。兩童子夾鞭之。張乃得乘。須臾至一山中。見茅屋數間。道士坐其中。張再拜請教。道士指庭中曰。此有丹。子宜自取之。張尋索再三。無所見。惟見東南角草中有糞堆。道士嘆曰。子無緣當留形住世間耳。居月餘。頗有所得。一日偶出游。遂迷其處。尋路出。乃在大同城外。既歸。時乘驢至杭。治金箔如故。旦暮能數千里。或縛草為龍。乘之而行。歸則挂簷下。亦時作戲術娛人。李陵君聞之。召至闕下。斥以妖術聚眾。張頓首謝曰。臣非妖術。特戲術耳。欲試之。張出袖中小銅瓶。注以沸湯。中出五色雲。充滿殿庭。空上悅。上欲盡其術。時方隆冬。索乾蓮子。撒金水河水上。頃刻水解。花葉滿河。香艷可愛。復索紙剪作一小舟。身入舟中。鼓棹放歌。往來花間。忽入岸中。失其所在。荷花亦不復見。河中固層冰積雪。寒煥風景迥異矣。

巡檢常中孚得異術。能煮銅為白金。凡寶玉之器有損者。補之。器完好如新。後以術動宣廟。陞授吏部郎中。每用其術。必引入便殿。屏絕左右為之。雖親嬖不得視也。

駱用卿為南海令。日有道士翁藏拙從武當來寄居白雪山寺中。凡七日一食。食必兼數人之物。餘六日飲水而已。以此為常用。卿叩之。天文地理。修煉服餌之術。無不精曉。會歲大旱。結壇禱雨。如期霑足。贈以金帛。悉不受。用卿間以黃白之事為請。道士即以足就地蹴泥。淖置火中。隨意以銅鐵投之。悉化金液流出。一日用卿方論道。坐中遽起。言適有緊急公文。將移新會。顧偶忘之。道士即請收公文。及用卿手書納懷中。時新會令為徐乾。默坐移時。探懷中出乾報緘。及印信公文俱在焉。用卿始大駭異。旦暮虔拜請教。道士曰。君惟地理一事。稍可指授。若天文則有國禁。修煉則剝喪既多。且必不能棄人間事。無徒自苦也。遂攜用卿登山。指示龍脈沙水。起伏向背之勢。其言甚畧。不久用卿以朝覲至京。道士亦去不復至。后用卿遂以地理之術名天下。嘗至武當物色之。竟無知藏拙者。

正德庚午。太倉州有人買一鱉。三足。令其妻魚食之。頃之。尋其夫。不獲。惟見地上遺髮一縷。冠履衣服如蟬蛻焉。事聞。集其隣右赴官。或疑其妻殺之。將置於法。知州黃庭宣獨疑之。以為鱉有三足。為類當異。理不可測。乃悉集漁人求鱉三足者。立限以須。卒得之。廷宣召婦人烹調如初。出重囚與食。方引還獄。覺腹痛仆地。身漸縮小。頃

之形骨俱銷婦寃遂白。初漁人求鬻舉網兩得肉塊如人形而無手足。蠕動可畏。棄之。既而羣漁禱於水神。歷數日始得之。然爾雅山海經並稱三足鼈為能。蚩來未嘗言食之。能銷人形骨。惟字書言蚩如鼈三足。名短孤。能以氣射殺人。豈其是乎。又不知肉塊如人形者何物也。東方朔所稱肅伏蓋近之。若能者。豈古人雖知其名而未常食耶。抑太倉濱海。偶隨潮而入網者乎。

韓神醫。洪峒人。初業醫。不甚精。元末避兵入岳陽山中。遇一老僧。傳示方藥。遂以醫名山西。遙見人之顏色。即知禍福生死。時刻不爽。其孫肅生三歲。誤吞一釘。家人皆驚哭。頃刻待盡。神醫視之曰。此子決不死。然必待三年。釘乃得出。人莫有信者。遂定時日。書壁間。以俟。肅果不死。但每作腹痛。必絕而復甦。久漸黃羸骨立。及期。旦起。戒家人曰。兒疾將瘳。勢必大作。雖絕勿懼。宜先具一銅盆。煮少粥飲以伺之。既而果至。時腹大痛。一叫而絕。良久吐銅盆中。釘出。銳盡利。又復絕。至午時始甦。歲餘獲安。即忠定公父也。壽七十一卒。又神醫女。嫁龐氏。嘗為人送親。路經神醫門。神醫遙見之。大驚曰。女死矣。急遣人諭令歸家。其夜忽心痛而死。

海鹽祝主事家一童子。牧羊田間。有道士過之。出懷中藥一丸。大若龍眼。而色潤黑。

令童子吞之。戒之曰：勿語人也。自是數日不復飢，亦不思食。主人知之，復遣二童子與俱，伺於牧地。曰：若復見道士，一人挽之，一人急歸告我。道士果復至，謂向童子曰：吾憐而飢食，而大棗何為漏言，不奉吾戒也。以一手支其頷，一手擊其頂，黑丸忽自口中躍出，復收囊中藏之。主人聞報，急趨至。道士雙脚俱陷入地中，稍近益下，僅露其首。既而併首亦不見。地上亦無竅穴。驚顧間，道士已在隔岸，高揖而去。

凌漢章，湖州人，少學針灸，三殺人，乃棄其針於水中。針皆上浮水面。漢章曰：天命我矣，拜而受之。遂精研其術，名動天下。嘗至常熟，偶寓東海湯禮家。早起，聞其鄰徐叔元家哭甚哀，往問之。乃其子婦以產難死，叔元以為不祥，將身出付火葬。漢章急止之，命其夫發棺，揣胸前尚微溫，出針下數穴。良久，子下，婦得生。又一跛翁扶杖過之，自言少多瘡瘍，有庸醫誤折針膝中，今杖行二十年，莫能愈。漢章為從肩臂上針三四穴，折針從患處突出，棄杖再拜而去。

吳縣盛應璧家，有二石獅置庭中。其來已久。嘉靖九年十月間，啜茶於旁，暫置甌獅腹下。忽覺石獅身搖動，驚呼而入。家人悉出視之，則已越廳事入中堂矣。共擊碎之，出視西庭石獅，亦已離去。舊處數尺，遂併擊碎棄水中。其家諱之甚密。余家僕楊塗

妻出盛氏。因得其真。且見馬抑之記。武清縣民家。礧礧與磨石相闕。其鄰有生員。以木格之。兩石前却。觸木盡碎。火星迸裂四出。人力無所施。至暮乃自息。其家以磨石置汚池中。以礧礧沉井底。明日復自出門。□□□□□□□□□□乃止。抑之且言。親見生員道之。嘉靖辛丑歲五月十二日。北亭靈濟宮前石獅左眼上生眉九根。色黃。其端黑色。若結一蕊之狀。經數日脫落。

木生字元經。少有俊才。時康陵朝。以鄉薦入太學。與翼司諫。謹有場屋之舊。屢欲以生才藝上聞。生曰。人各有時。若錐處囊中。穎當自脫。甯待援手他人乎。倘果薦上。元經惟有被髮入山耳。司諫不能強。生亦謝去。攜琴遊齊魯間。攬結諸英俊。或眺覽名山水。往來兩都。時人莫能窺其際也。嘗登泰山觀日出。夜宿秦觀峰。夢有老婦攜一女子相見。甚歡。如有平生之分。既又遺一詩扇。展誦未終。忽曉鐘鳴。驚悟而起。其所夢經行道路第宅。歷歷皆能記憶。明年將入都。道出武清。散步柳陰中。過一溪橋。道旁有遺扇在草中。收視之。上有詩云。烟中芍藥朦朧睡。雨底梨花淺淡粧。小院月昏人定後。隔牆遙辨麝蘭香。彷彿是夢中所見者。珍襲藏之。行未幾。遙見一女。即從二女侍遊樹下。迺遲將近。生趨避之。時為三月既望。新雨初霽。微風扇暖。女即徐邀。

二侍穿別徑結伴而去。生竚立轉盼。但覺帶袂飄舉。環珮鏘然。百步之外。異香襲道。綽約若神仙中人。遂以所佩錯刀削樹為白。題一絕句曰。隔江遙望綠楊斜。聯袂女郎歌落花。風定細聲聽不見。茜裙紅入那人家。倚徙彌望。乃行前至野店中。問諸村民。或曰。此去里許。有田將軍園林。豈即其家眷屬乎。生明日又往樹下。竟日無所遇。惟見溪水中落花流出。復題一絕句。續書於樹曰。異鳥嬌花不奈愁。湘簾初捲月沉鉤。人間三月無紅葉。却放桃花逐水流。自後不復相聞。然前所得道扇。每遇良辰勝會。未嘗不出入懷袖。把玩諷詠。愛如珠璧。壬午。聖人嗣統。數載間。文恬武熙。天下無事。思得賢士與之共興禮樂。司諫時已歷通顯。嘗因燕對奏上曰。臣所知有木元經者。才合春卿。名收賈董。陛下必欲更定禮樂。非其人不可。上遂命收入選部。時朝廷將大營建。隸名工曹。曹長師丹心善生。每事暇。輒邀生同遊。當春牡丹盛放。且所司有器皿。廠約生明日會廠中。同出土橋諸名園賞之。生至期。達旦。偶以他事後期。廠中皆上供御器。非主者至。不得入。生因勒馬以俟。道旁有井。馬渴。絕銜奔水。生恐下馬。馬逸。左右皆前逐馬。生就立井旁民舍。其家以貴客在門。召一鄰翁至。延生入。初經重屋。僅庇風日。以一中下民居。再起一關。則高堂藻飾。別一景象。又西過曲徑。越

小院其中樓臺閣榭金碧耀輝恍非人世。生稍憇便欲辭出。翁曰：內人乃老夫寡妹，年亦逾五矣。幸暫留伺馬至行，無傷也。生起揮扇逍遙，歷覽畫壁。翁從旁見其扇，進曰：此扇何從得之？生曰：吾十年前過武清，所得道旁遺棄也。翁借觀，遽持入內。頃之出告生曰：天下事萍梗遭逢，固有出於偶然者矣。適見扇頭詩，疑為吾甥女手筆，入示吾妹，固非誤也。生初入其室，廬皆若夢中。故所經行者，心固已異之矣。及聞翁言，愈疑之。再引入一曲室，幃幄鮮麗，金玉爛然。至其几榻整潔，琴瑟靜好，莫能名狀。須臾一老婦出拜，自言姓錢氏，先夫田忠義，官至上輕車都尉，往歲扈從西征，為流矢所中，輿疾歸武清。小女涓涓，時年十四，隨侍湯藥，偶遺此扇，不意乃入君子之手。今夫亡三載矣，覩物興懷，不覺遂生傷感。然當時溪樹上有二絕句，不知何人所書。小女因尋扇再至其地，經覽而歸。至今吟哦不絕於口。生請誦之，即其舊題也。老婦因請命娟娟出見，傳呼良久不至。母自入謂女曰：客即樹上題詩人也。娟娟強起，嚴服靚粧，與母相攜而出。至則玉姿芳潤，內美難徵，儼然秦觀峰夢中所見也。生又以夢告母，共相嗟異。久之，馬至，珍重辭謝而去。明日鄰翁以娟母命來，曰：未亡人有二女，其少先行矣。娟最愛，將賴以終未亡人身。然幽贊以神明，協以人未亡人，尚敢吝其愛女。

乎。請以弱女為君子侍。生辭之。翁申母命曰。先將軍無遺育。弱息僅存。使君子不以
下體是遺家。雖亡得婿公瑾。亡人且無憾矣。生乃請卜之。得解之九二。卜者曰。田獲
三狐。姓著占辭。事無不濟。但三狐得夫。恐不能永終。貞吉且。生猶豫未決。翁致三命
曰。吾聞古之君子。處大事必假於夢卜。夢生於心。卜決於人。今婚媾及事矣。乃不內
決於心。而顧取決於人耶。終不得辭。卒以其年四月戊寅成禮。娟娟妙解音律。通貫
經史。凡諸戲博雜藝靡不精曉。情好甚篤。未閱月。大工皇木至潞河。生將督運南行。
勢不能留。室內又少親幹。乃鎖院而去。母先亦暫至武清。遣人問娟娟。從門隙中附
詩於母。寄生曰。聞即夜上木蘭舟。不數歸期祗數愁。半幅御羅題錦字。隔牆裡贈玉
搔頭。是夕生適自潞還。娟出迎。生曰。方從馬上得詩。未有以復。即口占贈娟曰。碧窗
無主月纖纖。桂影扶疎玉漏嚴。秋浦芙蓉倚叢葉。半粧斜映水晶簷。生他日偶得鄉
人書。獨坐深思。娟以詩解之曰。碧玉杯中琥珀光。燈前把勸阮家郎。不須更憶人間
世。千樹桃花即故鄉。其冬十月。生以太夫人憂去職。河水既合。娟適病。不能偕行。生
存亡抱恨。計無所出。邀母與娟同居。約以冰解來迎。相與悲姻而別。明年春。娟病轉
劇。遣翁子錢卽以詩寄生曰。楚天風雨遠陽臺。百種名花次第開。誰遣一番寒食信。

合歡廊下長莓苔。生遣使往迎。比至則不起。匝月矣。辛卯冬。生再入都。過母家。見娟畫像。題詩其上曰。人生補過羨張郎。已恨花殘月減光。枕上遊仙何迅速。洞中烏兔太匆忙。秦娘似比當時瘦。李衛慙多舊日狂。梅影橫斜啼鳥散。繞天黃葉倚繩床。時多傳誦焉。

尹蓬頭。名繼先。臨洮人。目見徽欽北狩時事。至元得禮部度牒為僧。遇異人授以接命之術。元末常乘黑驢游燕雲間。接命於真定。遇羣盜奪其驢。刀傷其身。面二三處。遁入滇南山中避亂。泰中時。往來荆襄陝洛間。人尚未之知也。成化末。過江西。有宗室扣其術不答。宗室怒杖之。垂死。令左右置棺中。昇出。生焚之。尹密告昇棺人曰。死則死矣。幸微露竅穴。少便呼吸。其人憐而許之。及舉火。特空棺耳。游南都。成國公見所佩元朝羊皮度牒。始共駭異。知其年且二百餘矣。遣一婦人侍之。將私叩其術也。弘治末。復在南京接命。浙江鎮守太監劉瑾召之。夜過無錫高橋。巡司詰問。不答。被縛。明日出度牒示之。得釋。未幾將還南都。道經蘇州。從而拜禮者。日無算。知府林世遠收繫獄。月餘。瑾聞遣使至。釋之。正德初。太監賴義掌東廠。召至入京。劉瑾時方竊權。欲以威劫其術。尹終無言。瑾怒。遂以妖言惑眾。緝送法司議死。時閔公珪為刑書。

止令招年九十。免死。押發原籍鉗束。後居鐵鶴館中。一日土民修殿發土。土中得鐵鶴。士女悉集觀之。尹笑撫之曰。自我埋汝。忽復二百年矣。幸再相見也。跨鐵鶴背飛上殿脊。對衆高揖而去。守臣懼祕其事。初在刑部。問官叩其術。合用婦人否。頷之而已。或再三問之。自言每一接命。必得奇禍。是獄也。豈有餘殃乎。對問官。惟請死期。畧無懼色。一食能盡胡餅數十。酒數斗。或數日不與。亦未嘗告飢。平居惟單衣袍。隆冬不寒。及遣發日。忽向人求纊襪。或給之。甫出門。脫付解人。且曰。奉地苦寒。特求此贈耳。前所佩羊皮度牒。劉瑾收之。瑾死。用以殉葬。

當今神仙家所共知。而目覩者。有赤肚子。不知何許人。正德末。忽自密雲。就人家屋簷下居。冬月。雖大風雪。身無寸絲。惟以氈方尺餘。蔽其前後。或一食能兼數人。或數日不食。兩手指掌。拳曲不舒。人問之。不答。一日有道士乘驢過之。赤肚遽起。隨入一野廟中。相對悲泣。道士曰。我以汝為死矣。乃尚在耶。講論通夕而別。偏胡子姓許。善相術。比老。遇異人。令之相。許答曰。子神清氣清。骨清。神仙相也。異人笑拂其鬚。凡經掌握處。明日皆黑。因此遂名。後入終南山求道。今人多在齊魯運河中見之。若王野極憲廟。封為太玄真人。今上御極初。前星未耀。或薦之。召至京。不兩月死。其死亦甚異。

太監劉瑯鎮守湖廣。日聚斂酷虐。尤好煉丹。有祖母綠繚環一事。原用金一千二百五十斤得之。秦陵朝降香武當山。瑯從行。私欲有所禱。燒檄不舉。心疑之。問於道士。時道士中有挾邪術者。欲以術取其環。對曰。太監第自思。心有最愛而難割者。奉之於神。則神歆而舉檄矣。瑯仰思良久曰。惟繚環則竭一生之財得之。庶幾是乎。因積誠再啟壇設醮。虔拜畢。就腰間解置火中。須臾隨檄冉冉而上。漸出雲表而滅。瑯嘆異。又出金施捨而行。後數年。瑯守備南京。道士以繚環補加拂拭。畧變本形。賣與之。得價亦如初。謝子象以詩誦之曰。堆金積玉等邱山。猶自貪心學鍊丹。空裏得來空裏去。玉皇原不繫繚環。

高坡吳纂卷下終

明 大學士劉文寶著

昔我太祖高皇帝膺受天命驅逐胡元遁歸朔漠其末帝妥懼帖木兒既殂太祖以其嘗君臨華夏也諡為順帝可謂盛德至仁矣順之遺胤據其故穴仍君長其醜類世數莫考惟知其地名瓦剌其君立於宣宗皇帝時者名普花此稱為可汗而彼自稱不可知計必仍僭其先世大號也故其臣亦悉用故時將相稱號豈非羊質虎皮驚翰鳳鳴者哉稱丞相二人曰和甯王阿魯台曰順甯王脫懽常遣使朝貢朝廷賜以詔書亦稱之曰王其後二人相繼死而脫懽之子曰野仙悉有二人部屬其號為太師君臣異處常不相見普花娶野仙妹以相固結今皇帝即位以來野仙每年冬遣人貢馬朝廷厚答金帛過元旦郊祀始去久而漸桀驁不恭往來通使等變詐翻覆告以中國虛實野仙求以其子結端於帝室通使皆私野仙進馬為聘儀朝廷不知也答詔無許端意野仙媿怒以正統十四年七月初八寇塞外城堡多陷沒邊報日至遣駙馬都尉井源等四將各率兵萬人出禦之源等既行司禮太監王振復勸上親征命太師英國公張輔太保成國公朱勇等治兵朝臣奏疏請

留不允。十七日。駕行命郝王居守。每旦於闕左門西面。受羣臣謁。見朝政皆太監。金英吏部尚書王直。鄺埜學士曹鼎等。官軍私屬共五十餘萬人。出居庸關。抵宣府。井源等敗報踵至。上至大同。暮有黑雲如織。軍營雷電如雨。振惡之。乃以駕還。八月十三日。至狼山。虜追及。遣朱勇等三萬騎還戰。皆敗死。無隻騎回。是日駕至土木。日尚未晡。去懷來城僅二十里。欲入保懷來。振輜重千餘輛在後。未至。留待之。遂駐土木。旁無水泉。又當虜衝。十四日。欲行。虜已逼。不敢動。兵士束手飢渴。十五日。虜使持書來。以求和為言。召曹鼎草教與和。遣二通使與虜使偕去。遂移營踰壘以行。迴旋之間。行列已亂。爭先奔迸。勢莫能止。虜騎蹂陣而入。奮長刀以擊我軍。大呼解甲投及者不殺。衆裸袒相蹈。藉死蔽野。塞川。虜叢入中軍。宦侍虎賁。矢被體如蝟。上與親兵乘馬突圍不得出。虜擁以去。文武軍吏幸免者。蓬首赤身。踰山墜谷。連日飢餓得達關。虜舉我輜重。惟取其金銀珠寶貴細者。其實虜衆僅二萬。我師死傷者過半。十六日。上在虜營。手書遣使與懷來守將。言被留。且索金幣。懷來城閉不可入。縋而登。復遣人送至京。以其夜三鼓。從西長安門入報。十七日。百官集闕下。頗聞敗報。私相告語。愁歎驚懼。出至紫陌。見軍士奔歸。瘡痍被體。血污狼藉。然尚未知。

上所在也是日午遣使齎黃金珠玉哀龍段匹等物馱以八馬詣野仙營請還車駕
十八日皇太后召百官入集闕下命邴王權總萬機於午門南面見百官始啟
事奉令施行衆皆謂行且即真矣數日內外洶洶不自保已而皇太后詔天下
立皇子見深為皇太子又數日尚書于謙等彈奏奸臣王振傾危宗社歷數其
罪千言讀既畢王諭以自有處置謙等言振罪惡滔天今日不正典刑滅其族臣
等皆死於此決不但已也因痛聲聲徹中外王起入內使將闔門衆擁謙等隨入太
監金英傳令旨且退衆奮欲粹英英懼言今籍沒振遣指揮馬順往衆曰奸臣黨也
宜遣都御史陳鎰英脫身入順前勸解辭色稍遽給事中王竑粹順首衆爭毆之蹴
踏捨裂頃刻而斃或就脫順靴擊出眼血流門闕前衆愈怒求內使毛玉等二人英
使人粹出亦擊殺之曳三屍陳於東長安門軍士猶爭擊不已陳鎰等奉令旨籍振
宅並其黨彭得清內使陳管家等頃之執振姪錦衣衛指揮王山至反接踞於廷共
唾罵之乃宣令旨獎諭百官各歸蒞事拜謝而出明日移王座入奉天門左受朝
由此即真之議益急振宅在宮城內外凡數處重堂邃閣僭擬宸居器服綺麗尚方
不逮王盤徑尺者十面珊瑚樹高六七尺金銀十餘庫馬數萬匹鬻山於市其族屬

無少長皆斬。山弟林亦為錦衣衛指揮。從振死於虜。林尤凶悍。姬妾百數。二十二日。虜擁上至大同。城門不開。校尉袁斌隨侍。以頭觸門。大叫。於是廣甯伯劉安給事中孫祥知府霍瑄同出見。獻蟒龍袍。上以賜知院伯顏帖木兒。及野仙弟大通王賽漢王。上曰。秋稼未收。軍士久飢。可全刈以入城。又曰。虜欲歸我情。偽難測。宜嚴為備。安等獻酒。上酌地飲訖。虜令括城中犒軍物。并內官郭敬等金銀。共二萬餘兩。來迎駕。既獻。虜笑不應。二十三日。上索西瓜雪梨。則與虜食訖。遂去。過貓兒莊。九十九海子。又行見蘇武廟。李陵碑。以二十八日。至黑松林。野仙營在焉。上入營坐。野仙拜稽首。乃侍坐。宰馬設燕。出其妻妾四人。以次奉。上酒。歌舞以為娛。其後遂奉。上居於伯顏帖木兒營。去野仙營十餘里。伯顏帖木兒與其妻見上。亦如野仙禮。伯顏帖木兒每二日獻羊。七日獻牛。野仙每七日獻馬。二人者。每出獵。則又以其所獲野馬黃羊之類來獻。二十九日。皇太后命。王早正大位。以安國家。有司擇日行禮。眾相率詣文華殿門。請。王出見。辭讓不允。眾共言。祖宗神器不可虛。聖母有命不可違。有旨從請。乃再拜山呼而出。九月初。野仙遣其酋長尚書來言。欲送上還京。入見。賜以冠帶綵段。臨行以金百兩。銀二百兩。綵段若干匹。賜野仙。初六。

日。王即皇帝位。遙尊上為太上皇。大赦天下。百官六軍賞賜有差。後十餘日。野仙復遣使至。書辭悖慢。朝廷復書。大畧言中國已立。皇帝天下。兵甲衆盛。可相抗禦之意。已而命羅通。孫祥皆為副都御史。守居庸。紫荊關。石亨為武清伯。總京師兵馬。十月。野仙入寇。自紫荊關入。殺指揮韓清等。孫祥走死。初九日。虜至京城西北關外。石亨等營於城北。兵部尚書于謙督其軍。都督孫堂營於城西。刑部侍郎江淵參其軍。交趾舊將王通為都督。鴻臚卿楊善為副都御史。守城。虜連日抄掠。亨等與之殺傷相當。其酋長鐵頭元帥死焉。時畿內降附胡人留居者多。乘時為寇。朝廷重賞購捕。被獲者累日不絕。虜稍沮。復遣使言欲和。十七日。以通政參議王福為禮部侍郎。中書舍人趙榮為鴻臚寺卿。持羊酒往野仙營。與其弟及伯顏帖木兒。檄甲冑。厲弓矢。太上帶刀引福等前。露及夾之。福等拜訖。野仙揮却羊酒。取敕視。蕃字。太上取敕視。漢字。野仙謂福爾等皆小官。可令胡淺王直于謙。石亨。楊善等來。福辭歸。時四方兵漸集。虜夜遁。從居庸關出。遺所掠人口牛羊於路。以緩追兵。太上自紫荊關出。乘馬踏雪而行。遇險則袁斌執鞚。既入虜境。野仙來見。宰馬拔割肉。燎以進。云勿憂。終當送還。食訖辭去。十九日。瓦剌可汗普花遣使獻馬。是普花駐兵。

關外未入。至是以尋舊約。通和為言。朝廷以其來緩師。却之。胡濙王直言。普花野仙。君臣素不睦。宜受其獻。以間之。從濙等言。亦使人入見。獻馬八匹。賜衣服冠帶酒饌。金帛。視常年有加。二十二日。遣揚洪孫堂范廣等帥兵二萬擊虜之未去者。二十五日。破虜於固安。得牛馬驢數百匹。奪還人口萬餘。十一月初八日。以虜既退。京城解嚴降。詔撫安天下。十一日。免朝。百官望拜。太上聖節於朝天宮。十三日。揚洪等旋師入。見言虜衆已盡絕。其實不過百餘。散掠各郡。驅人畜以自擁衛。望之若萬衆。官軍不敢逼其南去者。各軍以漸捕獲之。北去者。洪等逐至關。殲焉。猶殺官軍百餘人。洪子俊幾為所殺。既奏捷。以洪為昌平侯。與副都御史羅通練兵於東教場。石亨練兵於西教場。二十三日。野仙遣使來索大臣迎。駕約以後月初三日。至其營。否且又入寇書。辭其慢。不答。二十九日。冬至。免朝賀。每年是日遣官祭長陵。獻陵。景陵。至是以胡冠近在山外。陵旁官宇祭器。皆被焚掠。守陵官軍死亡逃竄。暫輟祭禮。十二月初二日。贈太師英國公張輔為定興王。學士曹鼎為少傅。吏部尚書文淵閣大學士皆死於土木者也。初四日。尊皇太后為上聖皇太后。初七日。尊母吳氏為皇太后。初八日。立妃汪氏為皇后。冊太上宮嬪周氏為貴妃。即皇

太子所生母也。初十日。詔告天下。赦在京流以下罪囚。景泰元年。庚午正月初一日。受朝免賀。初七日。太上書至。索大臣來迎。命公卿集議。推舉舊任老成當行者。初十日。大祀。天地於南郊。慶成。賀宴如常年。十八日。遣都督范廣等率兵巡居庸等關。以虜入遼東甯夏。皆有報至也。二十九日。遣都督等官石彪等率兵巡懷來宣府等城。閏正月初十日。諜報虜掠西陲。取慶府。楚府所牧駝馬牛羊以去。二十六日。大同奏虜至城下。總兵官郭登敗之。陞登定襄伯。二月初一日。大同奏敗虜於黃土嶺。獲首級十三顆。馬驢一百十三匹。奪還男婦二百二十五口。器物稱是。指揮使許貴之功也。十四日。宣府參將楊俊執喜甯。喜甯內侍從。太上在虜中者也。數導虜入寇。上患之。太上亦以虜入寇不已。則和不可必。不和則還京未有期也。惡甯甯又忌袁斌。嘗誘斌出營將殺之。太上覺其詐。急召斌回。乃得免。及是。斌言於太上。遣甯傳命於俊。索春衣。因遣軍士高磐與俱。斌刻木藏書。繫磐髀間。以示俊。俾因其來執之。俊既得書。與甯飲城下。磐抱甯大呼。俊從兵縛至京師。處以極刑。於是虜失其向導。亦厭兵矣。十六日。以石亨為征西大將軍。率步騎三萬五千人出紫荆關。以巡北邊。其後虜涉春及夏。不復大入。六月二十六日。野仙以屢使議和不成。俾其知樞

密院阿刺為書。遣其參政完者脫歡等來。上疑其詐。召文武羣臣議。以為虜交兵既久。士馬疲怨。又失常年和好之利。度其情出於誠。且太上在虜。理宜迎復。虜縱以詐。我當推誠。上聞。允遣禮部侍郎李實大理少卿羅綺指揮馬顯興脫歡等。以七月初一日行。十一日。至野仙所營。失八兒禿之地。野仙曰。兵端自因通使陳友等。小人締構。以致小事成大。及我送太上還京。不遣大臣來議。又殺所遣使臣張關保等。我回北後。遣者盈不花等。亦不生還。其故何也。實等答曰。太師雖名送。駕兵行不戢。攻關掠野。朝廷豈信。張關保等死於陣者。盈不花等未至京。皆因將士不以為來和。而以為來戰故也。野仙曰。喜甯是朝廷內臣。我所遣來。何為亦見殺。實等答曰。喜甯蒙太上厚恩。却乃導引太師兵馬殺之。宜矣。野仙曰。太上在此。我令伯顏帖木兒早晚恭敬。未嘗失禮。因以酒酪飲實等。十三日。遣人引實等至伯顏帖木兒營。見太上。實等拜泣。問起居。太上曰。朕非以畋遊而出。實為生靈除害。然陷於此者。王振所致也。及野仙實意送朕回。又被喜甯屢次阻住。但唆令進兵。今王振喜甯皆死矣。因問上聖太后與上安好。又問舊臣數人。又曰。在此踰年。始見卿等。曾將衣服靴帽等來乎。實等曰。虜中屢有人走向。皆不知車駕何在。朝廷遣使

亦無回報以此臣等行時諸物未帶時御用物惟金龍繡枕在實等因自出所有金器燒酒焙肉等為獻欲盡取所齋米來獻太上曰小事勿勞卿也為朕通和乃大事爾實等因極言振曩昔擅國致寇之罪太上曰振未敗時無人肯言然言朕亦不能燭奸悔復何及語將畢伯顏帖木兒至太上賜酒共飲伯顏帖木兒復邀實等至其帳相與飲實等至太上帳求留宿館伴者不肯實等乃至野仙營宿十三日野仙置酒以飲實等野仙曰爾等念太上否實等曰君父蒙塵臣子豈不念乎野仙曰爾等既念何不迎回實等言來迎之意野仙將從之伯顏帖木兒言禮物未備不可容易野仙乃止凡實等所與野仙及伯顏帖木兒語者其妻皆並坐共議傳酒相酌野仙伯顏帖木兒貂裘帽其妻珠琲覆面垂肩盜酪孟肉粗塊長啜亦更互吹彈歌舞以為樂十四日野仙遣其右丞把秃同實還貢貂皮馬匹遣其尚書土兒罕同羅綺往大同調回虜兵不復擾邊實辭太上袖出書三通以授實其一奉上聖皇太后其一達於上一其以諭羣臣伯顏帖木兒約實速來成和好且指野仙幼子曰此與朝廷議媾者也實不敢對十九日實至懷來遇右都御史楊善侍郎趙榮同可汗普花所遣使皮兒馬黑麻北去蓋瓦剌國政皆野仙專之其兵最多普

花雖為可汗。兵稍少。知院阿剌兵又少。君臣鼎足而立。外親內忌。其合兵南侵。利多歸野仙。而敵則均受。及欲和。則野仙耻屈意。而陰使普花阿剌來言。刺所遣脫蔽既多。實等行。普花所遣黑麻等。復要善等出。惟慮和之不成也。實等既至京。緣邊虜兵皆退。二十九日。善等至野仙營。野仙方出獵。八月初二日。回營。與善等相見。太上遣袁斌來會。斌卧起常不離。御帳甚寒。則以身為。太上温足。斌嘗病。太上坐壓斌肩背。取粥啖之。以出活。至是從旁促善等使盡言。野仙遂許送。太上還京。平章昂克曰。既是送還。有禮物。善等曰。太師敬我君父。故送還。豈先論財乎。朝廷臣子蒙太師盛德。豈有不報。野仙曰。昂克說不合理。我圖垂名後世爾。衆酋聞善語。皆以齒咬其指曰。好漢好漢。初三日。善等見。太上於伯顏帖木兒營。初四日。野仙請太上至其營。餞行。野仙彈琵琶。其妻奉酒。善等侍飲。執臣禮甚恭。野仙歎曰。中國好禮數。宴畢。野仙送出十數步。太上登馬。乃退。蓋太上在虜踰年。未嘗屈尊。野仙間見。必致敬。曰。我人臣也。可與。天子抗禮哉。嘗欲以其妹事。太上不從。乃止。以此深服聖德。虜人往來窺覘。天容穆然。殊無慘沮。惟聞實等言。聖母安好。乃泣然出淚。飲食所餘。多以。賜中國被虜者。及其將歸。莫不悲戀。虜人亦不忍別。連

日各設筵餞。初八日。太上駕行。伯顏帖木兒護送。十一日。駐蹕野狐嶺。伯顏帖木兒等數百騎。皆慟哭良久。始別去。昂克於中路射麝獲之。馳追十數里來獻。十三日。駐宣府。十四日。駐懷來。十五日。駐唐家嶺。上遣內閣學士許斌商輅至。太上命書。誥諭避位。免羣臣迎。十六日。自東安門入。上迎拜。太上答拜。相抱持而哭。各述授受之意。推遜良久。乃至南內。羣臣就見而退。大赦天下。有生咸欣欣焉。聖朝承平既久。釁孽潛滋。內而奸臣播弄。外而驕虜憑陵。已已之變。尚賴天心默佑。皇圖鞏固。振威以遏其侮。厚德以化其順。故庚午中秋之慶。亦亘古所無。斡旋乾坤。並明日月。用夏變夷。撥亂反正。何其神速也哉。臣因所目擊耳聞。參以揚善季實所述。奉使錄錢溥所述。袁斌傳約其繇。蕪共為此錄。蓋出征之月。否卦用事之月也。迴鑿之年。景泰紀元之年也。先之以否。繼之以泰。雖則世運關天數矣。名之曰否泰錄。自以身備史臣。於國家大務。不敢不具載。以備遺忘故也。雖然。聖神相繼於億萬年。撫念前事。豈不增致治保邦之良圖哉。

否泰錄終

說聽卷上

明陸榮撰

辛巳 武宗晏駕。今上入繼大統。方在冲年。登極之日。御龍袍頗長。上俛視不己。大學士楊廷和奏云。陛下垂衣裳而天下治。聖情大悅。

是歲元旦。五更有大星如月。自東南流於西北。白氣如練。已而凝然化形。中濶兩頭。尖如人目。食頃而滅。又望後二日。白氣二道。東南亘天。

壬午七月廿五日。自浙江三吳。西至金陵揚州。大風發屋拔木。入午夜方止。江海皆溢。死者不可具算。先是吳中東鄉多巨魚。見風變後頓絕。野門一鮎長丈餘。食人亦為鄉民所得。蓋俱水妖也。

嘉靖初。經筵講官顧鼎臣講孟子咸丘蒙問章。至放動祖落等語。侍臣皆驚。顧徐云。堯是時已百有二十歲矣。衆心始安。且服其善於說辭也。徐縉講論語曾子有疾章。空鳥之將死四句。既而有御札下內閣云。今日講書。足見講官忠愛。但死生常理耳。何必諱。明日還補進來。上之英明特達如此。

太監谷大用迎駕承天時。所至暴橫。官員接見。多遭撻辱。雖方面亦有不免者。然

欲辱捷必先問曰。你紗帽那裏來的。湖廣某縣令聞之略不為意。云到我必不受辱。及大用過其地。某人見大用仍喝問云云。某答言老公公知縣紗帽在十王府前三錢五分白銀買來的。大用一笑而罷。竟無所加也。某出人問之曰。中官性屬陰。一笑更不能作威矣。是令智謀之士也。記之俟訪其姓名。

東洞庭山黃訓。為諸生時。渡湖覆舟。水中若有人云。死却罷。又有應者曰。一月兩日。如何死得。飄至湖濱。獲救。後舉正德甲戌進士。授兵科給事中。三十二日而卒。卒後若干年。其姻家有事召仙。忽降筆云。吾乃山鬼。安知某親家之事。謙讓二兄。當自知之。訓二兄名謙名讓。乃知為訓也。

甯波王文。壬午歲館於無錫華氏。文病踵不良於行。時八月某夜。文已就寢。忽聞兵甲聲。又有促之起者。文起見火光燭天。有紅袍大官自空而降。入坐中堂。從者百餘人。皆花衣綉裳。列侍左右。文驚恐長跪。大官問汝何人。文告以名居。曰。既在斯。即吾治下。何不來相見。文辭以足病。云但來無妨。遂去。詰朝。主人強其往游惠山。至拜張睢陽像。則夜間所見也。不覺慳然。足疾頓愈。時華氏子鑰應舉南京。不數日發解。報至。眾謂正神降其家。禎祥兆矣。

鄉人郭鎰素狠傲不信神佛。嘗七月中浴罷抱琵琶行。舉首見屋頭雲際現真武形。披髮按膝躡龜蛇。左右二神人執旗捧劍。若世間畫像。鎰急索衣冠呼家人焚香設拜久之。雲氣一湧乃不見。自是闔門不食葷物。日誦真武經一卷。其子亦如之。

陝西洋縣人王奴。奴妻李氏。永樂十六年六月十六日生三男。縣令王黼再奏遣使給賞。

嘉靖二年。東廠一本為生異常產事。京城民朱鑑妻。二月十一日生一子。十二日生一子。十三日生一子。奉 聖旨照例恩養。

湖廣襄陽縣主簿坎某。真定人也。一日命匠人修馬櫪。匠至晚還家。其子問何晏也。匠語之故。曰得非真定坎三耶。父驚問何以知云。兒是彼隣王三也。坎選官時。借我銀三十兩。彼處闖王廟鼓。亦我出錢。造者家有祖母母親及二子。猶憶穿藍紅衣乘馬。何乃在此。餘皆可置。獨念阿母耳。匠往報坎。坎云。王三者死數年矣。借銀造鼓事。果有之。即召此子至。首問母安否。坎答以無恙。與坎道其前生問身後家事甚悉。時吾鄉朱紳為縣令。親見此子年五六歲矣。

涿州史四素無行。在別墅姦其隣人女。長兄聞而撻之百餘。遂歸死於途。家人不知。

也見其疾趨入門妻在室將產亦云郎已回頃忽不見隨生一男面骨皆半青方疑駭而史凶計至矣昇屍來家其面骨半青與子無異乃知即父託生也

湖廣辰州衛王千戶妻楊氏目中常見有二雞相鬪意甚憂惶託其兄楊六往告張真人真人批狀云仰十六代弟子辰溪張朝陽治之楊六至辰溪問土人云果有是人得一劍每乘之上下空中縣令駭其事取劍藏諸庫令為巫遂訪之致真人指朝陽乃來設壇升坐使王延羽流有道行者四人環誦金光明呪楊跪伏壇下朝陽閉口目鼻垂肉柱漸長至數寸若死人矣忽跳起云我溫元帥也楊氏前身乃賣燒餅王狗兒謀殺十四歲童子投之枯井取其金八兩今雷部將擊汝特先示其兆耳楊哭拜不已云爾肯捨財結佛緣庶可免不然死無日矣楊如言施金若干為修梵宇費而鬪雞不復見矣後竟得善終云

正統間郡吏張一者領上官檄如松江經常熟避雨一農舍其主知其吏也延坐烹肥割鮮意甚殷勤遂宿其家陰雨連綿留三日乃去臨別依依不忍分手吏初感之及還思其家充裕忽起惡念曰是可以術餌也教獄中強盜誣指之而復使人往報曰可來豫計也其人恐遂求救於吏吏索金百兩曰我為汝營脫其人欣然與金乃

繫其盜而解之。其家甚德吏。初不知說謀也。愈益親之。未幾吏死。其人夢吏衣冠入門。覺語妻曰。張提控何為而來乎。是日母牛產一犢。吏之子夢其父告曰。吾向者詐取某人財。今被冥司降罰為其家牛。汝可贖還。毋泄。恐為人笑也。其子遣僕持厚價。託言吾主棄吏業農。使我市牛。其人謝無有。則謂之曰。公家犢可用乎。其人不可。乃還。其子又夢父曰。彼必不售。當以情懇。子如其言。遂得牛。飼之。若父數年死。

金壇縣建昌園有鄧成十六者。正德中長鄉賦。其鄉小民貸其資。鄧重利取之。至破其家。已而鄧死。期年見夢於子曰。吾以刻剝某甲事。為陰司所譴。令作畜生於其家。初為豕。見殺。今復為牛。數月矣。昨得價若干。并母賣與鄉人。明晨來當牽至某橋下。汝其倍價贖還。庶免於苦也。其子汗洽而覺。白其母。母夢亦如之。大驚。亟持銀待於橋下。果有人牽二牛至。問之。正買諸某家者。價亦如數。遂增價買歸。置之密室中。飼以杭飯。夏則紗幘障之。事如生時。其犢始至。即游行園窖間。若巡視者。東作時至田所。為一佃僕痛鞭曰。汝死作畜生。猶復管吾輩耶。是夕又夢於子曰。某人無狀。嗔我。大被鞭策。汝為我懲治。其子遂笞其僕而逐之。壬午年先君往茅山間。輿夫言此。顧欽者。南京人。由鄉舉知福建福寧州。一日坐視事。有烏鴉千餘集牆宇。鳴噪。顧使

人麾之不去。俄有數鴉頭墜庭中。顧忽頭痛即死。

江西安仁縣廨有妖魅。縣令抵任。必殺狗祭之。否則病嘔血死。正德末。婺源汪公濟民。來知縣事。吏民首以是請。公怒不許。甫數月。果遘斯疾。而政聲則藉藉也。吾鄉顧淄川榮甫。其同年也。調樂安。過其地。進訪之。百姓競扳輿而言曰。吾儕小人。賴有仁君。奈何惜犬以輕生耶。丐公好為相勸。顧見汪道百姓語。汪曰。吾惡其事。涉誕妄耳。何愛一犬哉。主簿蔣某。崇明人也。後因顧之子德育至。謂曰。吾嘗設祭。祇欲屈公一拜耳。寔為斯民活。父母也。吾言而莫受。願子繼之。德育入具以告。汪曰。予積勞成疾。豈有他耶。修短命也。怪物安能死生之。卒弗從。未幾。汪公逝矣。毅然持正之死不回。君子哉。

吳縣民葉相。業商販。弘治十五年五月間。賃舟之松江宿澱山湖。舟人卜全與弟容利其貨。殺之。併及其僕葉驢。棄屍湖中。相見夢於母。言死狀及屍所。母驚覺。則湘妻子與家人夢悉同。相向而哭。遂詣其處。果得二屍以歸。一夕其子又夢湘曰。吾昔賃舟時。慮有他虞。將卜家兩人。年申姓名。寫船埠頭壁上。今渠以我錢埋廁中。銀往松江易麥。載貯楓橋牙家。本府陳通判泊船寒山寺前。明速往告。可擒也。子醒寤。馳視

之錄父手書尋問陳通判船果泊寺前因具訴其故陳遣人依言踪跡二兇獲之置於法。

温州府閩人費襄其母寡居忽有娠及期產四犬子母亦隨死

弘治間洛陽民婦阿周山行遇群猴執歸洞中一老猴妻之群猴故事不敢犯日採山果為糧或盜得米粟周敲石取火炊食之歲餘生一子人身猴面微有毛恒為老猴子視不得脫一旦老猴病目周拾毒藥傅而盲之乘羣猴出遂携子逃回夫家吾吳民婦邵氏乳史太守兒後隨至洛親見阿周母子

胥門外韓氏母豕生子豕首人身又常熟錢元吉家羊生一兒通體如人俱弘治中事也

弘治四年四月八日西安天雨毛其長尺許鬣黑色

十六年三月七日南昌縣民涂寬家母豕生子一十二口內有一豕不分陰陽一頭二身八足林見素奏行文獻通考云豕生八足下不一也

十八年冬吳中地大震產白毛又雨粉點

南京太僕寺舊倒寺丞與印馬御史同出巡御史官船寺丞民船文温州為丞時嘗

夢被雷震死。故投病在告。代之者某。一日當出巡。御史俟之久。不就道。問之。云。昨宵夢雷霆轟動空中。云。打民船的是。以遲留。御史曰。夢何足憑。公既疑慮。請易舟以行。御史遂乘民船。時天氣清朗。至中途。忽有黑雲起布。頃雷雨大作。寺丞竟擊死於官船矣。數不可逃。若此文公之夢。乃應於代者。不亦巧乎。

文公長子奎從宦滁州時。與一客遊。客多異術。能令鬼報事。即俗所呼樟柳神者。奎欲受其術。客教令斷慾四旬。乃設食於野外。以夜同往。客作法召鬼。享以食。鬼來無慮萬數。如風雨怪驟。奎驚甚。幾喪魄。客呼鬼名。一一問之。曰。願從公子遊乎。鬼言不願。即去。次至一鬼。云。願從。客出小木偶人。書鬼姓名。及生年月日於其上。以授文。縫著衣領間。晨起。沃盥墮地。而文不知也。鬼奔訴客。客語文令拾之。尋浴於池。方褫衣。又墮草間。圍人削草入其中。投馬食槽。鬼復往訴云。今必被馬嚙死矣。且言文君疎脫如此。我不願從也。客來請讓。令檢得之。就奪去。他日奎遊郊外。其僕書僮者墜馬。氣絕。板歸。召客視之。曰。此魂出耳。當為召之。索一雞。持至向地作法。收其魂附雞。雞便昏仆。携還。及公署門。則鼓翼叫噪。不肯入。曰。是有故也。重攝僮魂於空中。問之。答云。某欲進去。奈門神不肯放。何。於是設祭於門。乃以雞入。帖帖不動。以置僮身畔。少頃。

即活。

弘治間有貴戚封侯者。侍飲禁中。既過三爵。幾有太陽同物之意。伶人為一猴。乘高跳弄。指之曰。者。猴子扒得高。跌得重。□當寧諭意。為改容者久之。即赦罷宴。時文選郎中黃寶頗清白。而務勲黃金不謹。京師有語云。黃寶不愛寶。黃金却受金。都御史侶鍾巡撫江南。初無善政。巡按蘇松御史何某失憲體。百姓為之諺曰。侶都堂不侶都堂。何御史是何御史。

都維明先生博學多藝。務為韜晦。以名者造物所忌也。怪其子至敬好名。每嗤之云。別人著書別人開。我家都穆著書自開。偶乘輿畫一梅。尋悔曰。有一能當彼一能。何乃自表襮耶。淵哉若人。殆潛世之士哉。

吳趨唐解元伯虎。赴省試。有忌其文名。厭之者。中禍黜。歸行。素不羈。至是益游酒人。以自娛。故為俚歌勸人。及時行樂。其辭曰。人生七十古來少。前除幼年後除老。中間光景沒多時。又有炎霜與煩惱。過了中秋月。不明過了清明花。不好花前月下。得高歌。急須滿把金樽倒。世上錢多賺不盡。朝內官多做不了。官大錢多心轉憂。落得自家頭白早。請君試點眼前人。一年一起埋青草。草裡高低多少墳。年年一半無人掃。

又題子胥廟云。白馬曾騎踏海潮。由來吳地說前朝。眼前多少不平事。願與將軍借寶刀。其胸中感憤。可想見已。

顧先生蘭。居吳城臨頓里。受性介潔。不苟取予。率山東淄川人。觀父老為率邑民出數十緡以獻。竟賦詩却之。去。笑舒雙手去朝天。榮辱升沈總自然。珍重淄人莫相贈。近來劉寵不收錢。

蘇州府通判夏泉。江西南城人。精於天文之學。弘治甲子。署崑山事。云夜觀乾象。明年狀元當出此。其語聞於人。貢士十餘輩往問。夏云。狀元只在城中。第未知為誰。顧未齋以家於城。欣然自任曰。乙丑狀元屬我矣。已而果然。

崑山魏翁奎。

莊渠父

夜夢與顧翁恂。

未齋父

爭狀元。涇田數畝。訟於官。竟為顧所得。意甚忿忿。覺而方知為夢也。後莊渠與未齋同舉進士。廷試日。閣臣初擬定魏公第一。因

其策中有云。聞陛下。一日之間。在坤甯宮之時多。在乾清宮之時少。不可宣讀。抑置二甲第九。而未齋遂得首擢。記其夢時。二公俱未生也。

乾州唐文選。好為大言。鄉人號曰唐大冒。有狐擾民家。徵索酒食。少緩。立致污穢。文選偶經其門。大言云。妖誠無狀。必不敢近吾。及歸。狐已在舍。呼文選云。若言吾畏汝。

今欲相擾矣。自是留其家。為患益甚。文選無如之何。州城下故多狐窟。有傍城居者。夜見兩人立文牆間。長可二尺。着褐衣。蒲履布襪。相與携手語曰。臣耐唐文選。吾輩自求食。何闕彼事。而敢妄言。今必撓亂其家。令其至死乃已。及旦。其人以告文選。文選即具牒投之城隍廟。言神為一州主。乞為民除害。已而家中魅言稍含糊。城下人又見前兩人云。吾於彼無大仇。乃訴於城隍。剗去吾舌。今痛不可忍。奈何。因復以告文選。文選仍牒請行誅。以絕妖患。明日有二狐死城下。其家遂安。

弘治初。汴城張羅兒家。

北人呼羅為羅其家業此

歲朝具果餌供祖。越兩日漸少。張疑之夜伏几

下窺伺。至二更有白狐來盜食。張急起迎。狐忽變為白髮老人。張即以父呼之。食飲甚設。狐喜云。吾兒孝順。為之盡醉。遂留不去。凡有所須。必為致之。甫三歲。貲盈數萬。乃構廣廈。長子納官典膳。次子為儀賓。富盛既久。張忽念身後。子孫若慢。狐必耗吾家矣。乃謀害之。戲指窗隙及物空中云。能出入乎。狐入復出。試之數四。狐弗疑也。乃誘狐入。瓶閉置湯鑊內。益薪然之。狐呼曰。吾有德於若。反見殺耶。人而不仁。天必殃之。乃公閱歲三百。今為釜中魚。悲乎。狐死之三日。其家失火。所蓄湯餅。踰年。次子酗酒殺人。斃於獄。又明年闔門疫死。人以為害狐之報云。

周府後山狐精與宮女小三兒通。弘治間出嫁汴人。居富樂。狐隨之。謂三兒曰。吾能前知。兼善醫術。汝若供我。使汝多財。三兒語其夫。夫固無賴子也。即聽之。掃一室。中掛紅幔。幔內設坐。狐至不現形。但嚶嚶呼三兒。三兒立幔外。諸問卜求醫者。跪於前。狐在內。斷其吉凶。無不靈驗。其家日獲銀一二兩。時某參政之妻。患血崩。眾醫莫能療。病危矣。參政不得已。使問之。狐述待我往東嶽。查其壽數去。少選復嚶至。曰。命未絕。出藥一丸。云井水送下。夜半血當止矣。果然。又服二丸。疾已全愈。參政乃來稱謝。以察之。狐空中與參政劇談宋元事。至唐末五代。則朦朧矣。參政嘆服。聽民起神堂。吾蘇李元璧客於汴。病喉。勺飲不下者七日矣。求狐治之。以黃金一兩為藥直。請倍益。與之。乃得藥一丸。服之。即瘥。其神效之迹。不可悉紀。正德初。鎮守寥太監之弟鵬。召富樂索千金。富樂言所得財貨。隨手費盡。無有也。鵬怒下之獄。狐亦自是不至矣。鍾鑿鑿者。乾州人。隱於終南山。有遁法。都御史張泰聞其名。召見。欲受其術。不從。乃遣還。時大雨。左右欲以蓋送之。張公笑曰。不須也。鍾徑衝雨而出。倏忽不見。使人往覓。以果核室門尚高。而鍾已在內。衣裳了無沾濡。出携果核入房。身忽又在。外莫能測也。時與諸生共行至乾陵。諸生戲曰。先生有奇術。盡試之乎。謝無有。因強之。握土。

一塊遂不見。諸生至城門，則見鍾卧其下。曰：君輩來何遲也。吾晨二覺矣。其幻化若此。

鳳翔有牛師者，莫知其年歲。鄉里老人云：兒時見其狀，若是至今，猶不改觀。願如嬰兒，冬月不挾纊。士子數輩欲困之，大雪中俟其過，要與立語。踰時雪深尺，諸生皆不堪。而師略無寒態。當其立處，丈許雪不凝積。平生健飲啖，每入城中，數十家爭延致之。一時食遍，不云飽也。居城外故窰中。一旦卧疾，謂其弟子曰：吾病思戍肉，所蓄黃犬，其烹以飼我，勿去其皮。弟子如命，熟犬以獻。師食之都盡，曰：吾病似愈矣。可為我具浴。坐浴盤中。弟子益薪而去。湯沸而師不起。爛其半體。弟子至，亟扶出語之曰：吾不覺也。潰而成瘡，莫不可近。弟子厭苦，相知問候者，亦不敢入門。因歎曰：吾乃為人所惡，若此耶。起易新衣，去床褥積污，曰：可扶我坐坐，須臾而逝。時正德某年四月十五日也。及是月二十七日，有人持書至云：十五日見師於某地，令達此書於弟子。啟之，真手書也。後衆自他郡還者，皆曰：見師牽一黃犬在前，信為化去不死矣。濟源神廟有池，凡假貨財物賄者，隨券所書，浮出水面。吾蘇陸君美商汴城，往觀之。且輦草席數千求售，途中遇雨，席黥竟無買者。陸入廟祝曰：能使席售去，當為神易。

袍。雨旬餘不止。進香者。初買織。織盡。俱買席蔽體而行。價倍於常。既還。乃往掛緋袍。以謝神助。時值秦王府進繳於神。五彩金絨線結成價值百兩。拋於池中。移時弗沈。忽訇然有聲。出一珠。纖精光奪目。儀賓及宦者悟曰。王言絨織雖龍宮無有。故神現此。以示不足誇也。遂叩首請神宥而內之。二織繞池三匝而下。觀者歎異。其靈迹久著。罔測所以。國初金箔張乃謂伏機所為。歸倣其制亦然。殆設辭以抑之耳。張有仙術。自化伴神奇。豈造作所能者哉。

湖廣蘇伯修如雲南將還。有一僧來附舟。蘇初難之。僧言君姑容我。我將有所助。蘇不得已許之。中途登陸。羣盜二十輩追至。蘇惶迫無計。僧云勿畏。命主僕及貨聚一處。畫一圍圍於外。掐指罡呪。以袈裟鋪地。軒寢。俄而盜至。呼僧云。適見一商挾重貨與汝同行。今安在。僧曰。吾不知也。盜遍覓其間。終不能見而過之。蘇始感僧厚謝。僧不受徑去。

胡景春者。深陽人。一目重瞳。少時鬻油魯中。有全真道人。日買其油。不受直。道人感之。授以異術。遂能挾雙瓦飛數十步。履帕升騰空中。此類甚眾。嘗商於陝西。夜宿山中。孤姥家。姥言此地多盜。不可宿。景春謝曰。止則死於盜賊。去則死於虎狼。死等耳。

不如坐以俟之。因索水盃十隻，步罡誦訣，飲水斛許，有頃，盜二十餘人至，呼之曰：「何不啟門獻貨？」景春盡腹中水，嘆之。二十餘盜僵卧如被縛者。哀祈云：「知是胡師，聊相試耳。」景春乃釋之。盜虔謝而去。家居時，其子詐為盜，戲驚景春。景春謂真盜也，行術制之。子大呼心痛而絕，始知其子。亟呪解，則已無及矣。正德間，流賊劉六等猖獗，有司募求智勇之士。鄉人舉景春，應命有司，以其老罷歸，年八十餘卒。

都御史彭公澤奉命討河南流賊，募辨士往招降。否即與約戰，開封府學生蘇某請行。藩司給元寶二錠，蘇至賊營，賊禮宴，呼曰：「大王者與之談古今。」蘇響應無窮，白敬服。或云：白即某處薛御史，以罪罷黜，入賊為謀主。云賊取人心，食蘇蘇食之，賊不服。招而回，戰書書尾有詩云：「劍指青山山破裂，馬飲長江江水竭。精兵指日下南陽，干戈盡染生民血。」蘇歸返金於官，曰：「往時弗却者為老姆，計今既生還而受此，是以貨行，非忠王事也。」彭公歎賞，聞於朝，送國子監讀書，惜逸其名。

揚州鹽商張某，陝西人，挈少子居旅邸。某暫還鄉，丁甯老僕善調護，而郎君既經時，僕見其貌殊瘦，詢其隨身童子云：「每夜深，有美女從窗而入，未明即去。僕謂童子盍取伊物件為驗，童俟女就寢，竊一紫羅鳳鞋與僕。僕遍訪無所遇，而張生病矣。後因

縫人某甲至示之以鞋甲愕然曰若從何得此僕語之故而問焉云去年在巨族某氏為其次女作嫁時服一日忽有女子立屏間招我度量身材便覩記其鞋已而主翁怪衣裳短狹減工價謂余誣其女出閨闈莫能辨也今據此究之即引僕詣其家傳鞋於內託言為樣求售翁見而驚曰此斂吾長女之具必盜墓得之欲執兩人聞官始吐實翁未信往叩張生生道其妾容服色真翁亡女也遂發墓見棺之前和有巨竅若有物出入者啟視則面色如生一足無鞋矣翁怒而焚之張生從此病愈

吾蘇衛人王宗本行賈於汴抵夜則有美女入室與狎詢其居止名氏終不言久而

成疾疑為妖也伺來時以墨油塗其面女泣去旦日歷觀神祠至城隍廟延壽司捧

香合女像面有黑油以語廟祝毀之中有血水流出

王某洛陽人寓祥符以販木為業與妓者唐玉簪交狎唐善歌舞雜劇事某曲盡殷

勤為之迷戀歲遺白金百兩周府郡王其封號人稱鼓樓東殿下者以居址得名雅好

音樂聞玉簪名召見試其技而悅之以厚價畀其姥遂留之某悲思成疾賂府中出

入之嫗傳語妓云僕得一面便死無恨盍亦求之妓來間為言殿下首肯且戲云須

淨了身進來嫗亦告某某即剖勢幾絕越三月始痊上謁殿下命解衣視之笑曰世

間有此風漢既淨身就服事我某拜喏遂使玉簪立門內見之相向嗚咽而已殿下與貲千金歲收其息焉是事無足書書以發一笑耳。

洞庭葉某商於大梁眷一妓馮蝶翠者罄其貲迨凍餒為磨傭久之馮騎驢過其處葉適在街頭曬麥馮下驢走小巷中使驢夫招葉葉辭以無顏相見強而後至馮對之流涕曰君為妾至此乎出白金二兩授葉云以此具禮更衣來訪吾母如言而往馮私以五十兩贈之曰行矣勉為生計葉戀戀不舍隨罄其金仍傭於磨家歲餘邂逅如初馮謂葉汝豈人耶要之抵家重與十鎰且云囊傾矣倘更留必縊死以絕君念葉遂將金去買布入陝換楊利倍又販藥至揚州數倍貿易三載貨盈數千乃以其千取馮歸老焉彼哉以勢利交者盛如趨市哀如棄筵聞斯妓之行能無愧乎

白女者娼也與吳人袁節情好甚篤誓不以身他人近其姥阻截百端而白志益堅有富商求偶於白不從母垂之成疾以書招節一見節憚姥不敢往白憂念且死囑其母曰葬吾須吾袁郎來言終而絕及舉槨極堅重十餘人不能勝母曰嘻其是袁郎未至也即促節至撫棺曰袁郎至矣應聲而起人以為異袁為延僧誦經薦之如悲伉儷焉。

南濠金德宣。正德初販豆麥於楓橋河下。一晚入酒館。忽有客來。長身偉貌。美鬚鬣。金默異之。揖客共飲。歡若平生。竟與同歸。越宿。客謂金曰。吾舟泊澣墅。須遣价引之。金從之。客俟舟至。昇樓。哥出銀二千。并一簿授金曰。荷愛長者。敢煩派此於機戶。金視之。織龍鳳衣數也。駭問何為。曰。身是秦府儀賓也。奉殿下命辦此。時已秋杪。屈指計云。往探姻親宦閩者。初春到吳。幸預為督成。及期。已織完。畀之。客喜謝去。金後販布之湖廣江中。遇盜。金暨同伴俱就縛。劫貨將盡矣。有舸揚六帆如飛而至。中坐衣龍袍者。惟言搬却大船來。金偶舉頭。龍袍者見之。大呼曰。是吾故人。趨解縛。一行人盡得釋。招金過船相見。即鄉織龍鳳衣客也。慰問良久。設席款之。奏女樂。見其妻妾四人。酒闌。召諭羣盜曰。吾自資若輩。故人物毫毛不許動。舉遣之。尋語金云。乘舸浮海。未嘗公江。昨得一妹。趁便風游行。不覺至此。殆天假良晤也。臨別。又贈壓鷲黃金一錠。眾詢知其故。皆曰。某等數千金。劫去。因君復來。德君何已。願各分半以謝。金峻却之曰。若然。則予亦盜也。眾乃止。金從此不復為商矣。甲戌歲以解尸如南京。遇諸途。盜問其寓所。云明當叅候。是日盜與某都督飲博。巡江察院潛訪擒去。金惶懼累日。聞杖死始安。

阮章字襲之湖廣麻城人舉弘治己未進士授行人有一子曰朝陽少穎敏能文年十六領辛酉鄉薦益務博覽竟以好學成疾僅二十五死京師襲之右目先嘗至是哭之慟左亦喪明遂棄官歸歸時以朝陽妾劉氏改嫁京商王政劉懷妊五月矣襲之弗知也惟懼絕後禱於天齋戒三年積誦三官經一藏至癸酉春襲之從子朝東夜夢朝陽謂曰汝今年中舉北上可將吾劉氏子歸宗其秋朝東果發解赴京覓之弗得戊寅元夕襲之夢三位官人坐堂上呼其名曰汝時漸亨將重見天日矣引入堂東一室出竹筒中藥水點其目令交睫少頃開而復明見几上有小蚌園覺來弗效以為妄想所致也既數日幼女在懷嬉笑誤以手批目撥轉雙睛昏悶七日遂豁然復故其明日又夢羣婦引童子來云主阮祀者此兒也公何憂越歲己卯因鄰人張栢自京回始知劉生子果朝陽遺體也乃令幹僕偕張往叩劉夫婦云兒自嫁後四月餘生二歲少乳轉育市人楊富妻矣遂將厚贖之及來春到家年十有二且貌肖朝陽恍若夢中所見也襲之喜不自勝以祈嗣有應命名曰應祈先伯祖郎中公與阮同年知其事概子說之詳者襄陽戴蓋山所傳也

正德初徐州李百戶以酤為業一日有人負兒來市飲食年可六七歲矣李疑為盜

兒者。問兒從何來。其人曰。此吾主翁子也。自任所回。覆舟死。惟郎與某得生。流離至此。視其貌秀美。曰。子無子肯嗣我乎。其人幸甚。遂再之銀二兩去。留是子。從師讀書。又買一童。隨侍久之。有擡大士像。擊鼓鉢求施者。見兒抱哭。顧謂李曰。子陝西人。父兒兩載餘矣。自北而南。物色不可得。乃假募緣。到處引童子出觀。冀或相值。今何幸得之公家。李語之故。亟更衣登拜曰。公收育吾子。非常恩也。啟囊出白金二百兩。餽李曰。周流日久。止餘此耳。未足為謝。將兒去。後遣僕夫馳贈五百兩。又為買邊功投錦衣百戶。蓋其家貲百萬。僅有此兒。故報之若是。李之任數月。即移疾歸。安享富貴。終其身。噫。語所謂倘來之物非耶。斯亦奇矣。

正德壬申。黃河清。自清河至柳家浦九十里間。澄徹可鑒。凡五日焉。

戊寅秋七月初四日。吳中大雨。雨中有淡紅水如血。

無錫士子李芳春。己卯病疫死。踰日忽蘇。自言死時被一人引至地府。與數十人跪庭中。主者呼姓名。一一審錄。牽出就刑。吾前有八人。皆已縛去。次及吾。吾大呼稱冤。忽階下一人若舊相知者。見吾驚曰。君何為至此。吾對以素不曾奉接何緣垂問。其人曰。予姓繆。與君同鄉。嘗忝中舉。以死然。予識君。君不予識也。止卒。輩曰。且勿行戮。

待吾入言之。度其人似為此曹叅錄之類。入去頗久。復出。喜謂吾云。予已得請君免矣。便令解縛放出。行半道。見鼓樂騎從塞途。問之。答言。送新舉人。芳春。屬目見彩旗。上書舉子姓名。獨記中一行云。朱節。吳縣附學生。至數十騎。見已姓名。亦在焉。便有人扶掖升騎。而行行數百步。不覺便活。是年果中秋試。而朱節者。是同薦云。

張遠者。京師人。為鎮江府通判。一旦坐廳事。有三鵲飛集其間。鳴噪不已。麾之不去。殊怪之。無幾。以事忤。巡按御史東郊被逮。繫蘇之鎮撫司獄。一晚遠見三男子跪庭下。皆持狀稱冤。問之。則云。為錢穀事也。遠以蘇非所治。拒之。三人訴不已。遠曰。吾知若曹不過望我轉達於父母官耳。明當與言。令為若理。因俾各道姓名。納其狀。而遣之。及明。羣僚詣遠。遠述其故。出狀示之。乃無一字。但隱隱有墨痕而已。推校姓名。皆郡民。長鄉賦。以通負。庾死者。於是大驚。焚其狀。俄而遠得釋。復有三鵲集肩上如初。遷任數日。病死。庚辰六七月間事也。

周中立以祿命之說。知名都下。劉尚書纓為都御史時。為逆瑾所中。下制獄事。已白。猶未復官。造問休咎。先以亡兒儆命試之。中立曰。此命大佳。然厄於三十三。能過此。則善矣。儆沒之年。正如所云。劉公心服之。乃示以己命。中立喑喑曰。此大貴人。目下

雖有憂厄。然已出險就夷。異時官至八座。福履甚盛。未可量也。時鄉人陸坦為禮部主事。以公事被繫。當坐重辟。會有內援得解。命未下。公方遣吏為詞其事。因以坦與甲視之。中立云。此亦貴人也。但比日方有官事。其憂甚大。然亦解矣。猶可食祿數年。問何時曰。不出今日中。當有佳報。適所遣吏跪白曰。已有旨。陸止降外任。公殊駭。視日正中矣。坦尋出為知縣。稍遷郡倅以卒。刑部吳主事嘗從問命。中立為寫一通授之。吳以視囚入獄。二子尚幼。戲水濱。失足俱溺。死。妻驚痛。且恐夫歸被讎。遂自經。吳出獄。方知往咎。中立曰。此大事。何不素告我。中立曰。吾固言之矣。第歸視吾書。吳檢其書。中有兩語云。雙雙燕子入池塘。紅粉佳人上畫堂。乃驚服。

江西星士熊庠。游陝西。都御史某公。謫為叅政。庠推算云。某月中當復舊任。公不信。曰。如吾言不驗。責四十。驗則賞以匹帛。公笑而許之。至期果復官。先外祖值菴盛公。時為左轄。庠謂公曰。七月當擢西川都御史。公笑曰。陞擢則有之。至於地方。非爾所知也。庠言不驗。請如某公約。公亦未信。曰。金星旺。知在西方。及七月三十日。謂熊妄言必矣。自察院歸道。有人報公陞四川巡撫。公大異之。復命庠究言九天新雨露。雨省舊黎民。有言無祿者半歲。退謂吾舅氏云。相公於庚辰年不利。至庚辰。公丁內艱。

自蜀奔喪抵家。而新制以邊方重任。必俟交代。公知之。復自吳入蜀。竟治事半歲。而不食祿。其驗如此。

長洲劉縣丞不信妖邪。其子病。妻乘其出。延巫降神。問休咎。巫方伸兩指。謾語。適丞歸。見之怒。使隸執巫。將杖之。詰問汝何人。巫猶伸兩指。跪曰。小人是金元七。吳中有妖神。金元七。總管丞知其愚妄。笑而遣之。

鄉有小民夏某。初為巫。范舉人汝輿戲謂曰。汝初降神。宜有靈異。以示眾。明旦吾握糖餌。令汝啗之。汝言而中。則人信服矣。巫幸甚。及明降神。聚觀者甚眾。范握狗矢。謂之曰。汝能知我掌中物乎。巫笑曰。糖餌。范舒拳佯拜曰。果神明也。即以狗矢逼令吞之。巫恐事泄。忍穢啖盡。范暴其受欺。眾哄然而散。

明陸 祭撰

孝宗萬幾之暇。垂覽墳典。間亦好琴。臺諫時以為言。上笑謂左右。彈琴何損於事。勞此輩云云。然終不以為忤也。吾鄉有金某者。得古琴曰霹靂。携入都。介所識巨璫以獻。上試其音清越。喜甚。出內帑金千兩以賜。璫私其半。以半賚金。自上臨御。罕有醲賞若此。亦奇遇也。又喜觀畫。一日賞畫工吳偉輩。綵緞數匹。命曰。急持去。無使酸子知道。夫古先哲王。多寓意琴畫者。豈等於玩物乎。上猶容恤人言。可以仰闕聖度矣。

安福張簡肅公為舉子時。夢乘軒至一處。人云陝西也。登壇與中官武弁同坐。閱武介胄滿前。末一人奉盤進。其中餅也。取其一。啖之甚美。遂覺。而香猶在口。殊訝之後。公以進士起家。至都御史。巡撫陝西。時孝宗勵精。詔大臣簡閱武事。公與鎮守太監總兵。共坐將臺。全似夢中境界。及總兵設宴。一卒奉盤餅而進。公啖其一。味即如夢中者。始追憶其異。為子姓歸言之。其孫鰲山請曰。公夢既驗矣。何不多啖其餅乎。公曰。餅甚佳。若多食。則後必以此來餽。却之不可。就之非義。故一嘗而止也。聞者避之。

崑山毛文簡公幼時其父昇欲為聘燕氏女夜夢一老翁云是女夫爵小非二品夫人宣汝子舍耶覺而語妻妻夢亦然明旦冰人來云彼嫌嫁女弗居長姁文簡乃第三子故云婚姻事多半參差矣父亦以夢故已之既而同邑陳郎中愷奇公聰敏許妻以徐氏甥女後弘治癸丑公狀元及第累官至禮部尚書徐氏兩膺封誥先公沒贈夫人燕氏適一士子官終禮部封宜人故知人生伉儷皆前定非偶合者

史良佐南京人為御史巡西城而家住東城每出入怒其里人不為起一日執數輩送東城御史御史詰之其居首者曰民等總被倪尚書誤却曰尚書何如答曰尚書亦南京人其在兵部時每肩輿過里門眾或走匿輒使人諭止之曰與爾曹同鄉里吾不能過里門下車乃勞爾曹起耶民等愚意史公猶倪公是以無避不虞其怒也御史內善其言悉解遣之倪尚書謂文毅也南京守備太監某挾貴誇詡然喜延接士大夫獨戶部尚書王公鴻儒未嘗及其門還朝日九卿祖道都門外公仍不往或以為言某云談笑有他往來無他眾稱善謔謂其借古語嘲公也然在當時豈無重風節惡便佞者乎

外戚張氏在弘治間恩寵隆異勢傾中外金夫人有疾聞醫士劉彬文質名遣蒼頭

迎之。劉叱之曰：「皇親雖貴，亦人子也。為母病欲坐致醫耶？」劉文質非侯門聽召者，汝去矣。毋溷我，奴意甚愠。告其隣王指揮，王答以劉言良是。盡聞而主人翁，奴遂歸報。鶴齡兄弟即日登門拜請，劉乃往視疾焉。嗟夫！士能持志不屈，使貴強幹降心，可以為難矣。詎非盛世事哉。

顧南野棠，年十二時病瘵。父顥欲請張至和治之，恐其難致，使傭人負棠詣其所。且命之偽稱西倉傅氏。張診脉問誰家郎，傭對如主人旨。曰：「此繫金帶貴人，然其疾非多藥不瘳。顥忽其言，不復求治也。」經半載病劇，乃迎張到家。蔽棠帳中。張一按指，即云：「異哉！與傅家兒脉無二何耶？」顥驚以實告。張曰：「爾不應欺我。」遂索金百兩為謝。顥請損止三十。張諭以飲藥百帖，如言而疾已。後棠舉弘治乙丑進士官，終按察使。洞庭葉翁，冬月遺疾幾殆。羣醫咸以痰火治之。王時勉後至，獨云中暑也。眾皆掩口。時勉曰：「諸君莫嘆，定是初寒服夏藏晒衣，偶觸其熱氣耳。」問翁果然，投以香薷飲而愈。

張冲虛者，吳人，善醫，多奇效。有道人就竈炊火，一蜈蚣伏火筒中，誤吸入腹，痛不可忍。延張治之。張命碎生雞子數枚，取其白傾盃中，令服之。良久，問曰：「痛少定未？」曰：「似

定矣。索生油與嚙下。須臾大吐。則雞子與蜈蚣。纏束而下。蓋二物氣類相制。入腹則合而為一也。人服其得醫意云。

廉頗墓在趙州。能出物以借人。凡宴客無器用者。以雞黍祀之。焚其券。夜往取之。自金銀磁錫及桌椅之類。隨券所書。一一可得。宴畢。復設祭焚券。陳所借物於墓所。使人送之。入夜皆隱去。神怪叵測。若此。吾鄉程公。遵為州守。歸言其事。

程公同知溫州。領上官檄。檢校鹹場。稱度數日。茫無緒次。方難其事。有老翁來見曰。欲獻愚計。請屏左右。從之。乃曰。井字法。言記趨出。追之已去。沈思逾夕。始悟。因畫地作井字。令堆鹹九區。高廣相等。止稱其一。而餘八者悉定。不三日。鹹無遺數。上下聞之。皆驚異。

太倉州吏顧某。凡迎送官府。主城外賣餅。江某家往來如姻。後餅家被仇。嗾盜攀染下獄。顧集眾訴其冤。得釋。江有女。年十七矣。卜日送至顧所。曰。感公活命之恩。貧無以報。願將弱息。為公箕帚妾。顧留之。月餘。使妻具禮送歸。父母詢之。女獨處一室。顧未嘗近也。父又携女而往。顧復却還。後餅家益窘。鬻女於商。又數年。顧考滿赴京。撥韓侍郎門下辦事。一旦侍郎他適。顧偶坐前堂檻上。聞夫人出。趨避。夫人見而召之。

旋跪庭中。不敢仰視。夫人曰：「起。起。君非太倉顧提控乎。識我否。顧莫知所以。乃謂曰：身即賣餅兒也。賴某商以女畜之。嫁充相公少房。尋繼正室。秋毫皆君所致也。第恨無由報德。今天幸相逢。當為相公言之。侍郎歸。乃備陳首末。侍郎曰：「仁人也。盍揚之。竟上其事。孝宗稱嘆。命查何部缺官。遂除禮部主事。」

余少聞蔣氏姑言蘇城有少婦張氏歸甯。使青衣挈首飾一箱隨後。中途如廁。遺却。既行始覺。返覓。則有丐者守之。即以授還。曰：「命窮至此。奈何。又攘無故之財乎。婢大喜。以一釵為謝。丐笑麾之曰：「不取多金。乃獨愛一釵耶。婢曰：「兒倘失金。何以見主母。必投死所矣。遇君得之。是賜我金而生吾死也。縱君不望報。敢望大德乎。吾家某巷。今後每日早午。俟君到門。當分口食以食君。丐者曰：「爾身在內。何由得見。婢曰：「門前有長竹。第拄之。則知君來矣。如言往。婢出食之。久而家眾皆知。聞於主翁。疑有外情。鞠之吐實。翁義之。召丐畜於家。後以婢配焉。美哉乞丐。飢寒迫身。而為士君子之行。不尤難乎。吾故錄之。以為好義者勸。惜逸其姓名耳。」

常熟之直塘。今鰥有錢外郎者。險人也。家居武斷鄉曲。其里中有婦。曰趙重陽。色美。錢心慕之。且以其夫貧可餌。一旦召語曰：「聞爾有幹局者。何乃坐守困窮。吾貸爾錢。」

販布如何。夫幸甚。即以貨易布。使商於臨清。錢遂與婦通。豫居貨以待夫歸。歸一二日。輒具舟遣之。如是者數矣。里人皆知之。而夫了不覺。一日在客邸。與同伴爭譽。為發其事。夫忍恥歸。錢又如前遣之。既行。至木梳巷。潮落不能去。復暫到家。錢方擁趙暢飲。見之愕然。夫慚且怒。然憚錢之強。不敢發。旋回舟中。錢陰與趙計。夜遣人詐為盜殺之。而以被盜聞官。夫之族人知而發其謀。縣令楊子器。逮兩人鞠之不承。姑繫之獄。自是數月亢旱。桑通判民懌謂子器曰。君知所以不雨乎。坐趙重陽獄未決耳。君能雪此冤。雨今至矣。子器大悟。立加嚴刑。始歎服。少時大雨如注。闔縣歡呼。以為神。錢遂訴之上官。移獄於府。居歲餘。有劫盜十餘人入獄。錢享以酒。殺從容誘之曰。吾知爾輩不過一死。能為我認劫殺商人事。於爾罪無所加。而可以脫我。當厚給爾。盜許之。及被訊時。具歎首。一如錢指。錢乃援盜詞以辨。太守新蔡曹公鳳。召子器詰之。子器力言其故。曰。彼直巧為營脫耳。於是計不行。錢又訴於朝。下南京三法司提問。錢已賂要津為內援。竟以盜詞為據。錢與趙皆幸免。方出都門。少憩。是日天色清明。忽疾雷一聲。兩人皆震死。一時哄傳以為奇事。由此觀之。天道甚邁。可謂茫茫

金華貓人家畜之三年後每於終宵踳踳屋上仰口對月吸其精久而作怪入深山幽谷或佛殿文廟中為穴朝伏匿暮出魅人逢女則變美男逢男則變美女每至人家先溺於水中人飲之則莫見其形凡遇怪者來時如夢日漸成疾家人夜以青衣覆被上遲明視之若有毛必潛約獵徒牽數犬至家擒貓剝皮炙肉以食病者方愈若男病而獲雄女病而獲雌則不可治矣人多為是遲疑至死者府學張教官有女年十八殊色也為怪所侵髮盡落後擒雄貓始瘳吾蘇王訓導王次子隨任亦罹此禍病數年還鄉得生令其地不敢畜黃貓以成精者多是類也王之孫祖福嘗道其事。

角直徐翁子婦汪氏美而豔夜有少年來與狎家人知為怪而議祛之或言當召將美倏忽滅迹是後翁為具召客酒間眾問何為不樂翁以實告有笑者曰彼但逞於私室敢人前作怪耶語未竟墜一巨石震撼棟宇合坐驚散翁無可奈何使婦歸甯他日閒坐若見物有尾者從身旁跳躍而弗及諦視為何物也翁不久死怪亦竟絕盧秀才化成家對門其姻尹某嘗宿外寢一夕忽見男女數人長僅尺許謂尹曰汝

欲看西廂記乎。即搬演與優人無異。尹驚呼。盧弗聞也。明日知之。怪復夜起。命家人操兵擊之。入床頭而沒。檢得西廂記一本。乃尹素所嗜者。且觀且歌。怠以為枕。日久紙盡油矣。盧焚之。既而假寐。若有言者曰。能滅我形。難滅我神。遂時時火起旋熄。盧有侍婢。夜見空房中燈火熒熒。晝見嬰兒卧地。首像木偶。而身如線。一月間驟長。若年十六七者。每於窗隙窺婢。一晚竟攫入房曰。我仙人也。迫與合焉。以餅食婢。味似鵝油。飽三日弗餐。眾訝問。始吐實。久之庭前墻倒下。有一蛇。意其為妖也。從是妖怪皆出。乃遷去。

下塘蘇三。某日出外。有禿首白衣人倚門立。對蘇長揖。後每出入見之。雖竊疑異。竟弗問為誰也。蘇貧依其兄完。一旦受人欺侮。忿忿歸家欲縊。斯人即隨入。抱之上梁。又豎浴杵。令其踏足。杵散。跌悶於地。妻子奔救。獲甦。始言其故。而斯人不復見矣。或云。是討替鬼也。

崔府使允。京山侯元之弟也。初登第時。偕同年王侍郎寅之子允修。謁王之鄉。一前輩其人。問崔何人。王云。崔附馬弟也。乃兄附馬。此為附驢。崔答曰。即王侍郎兒。乃父侍狼。此為侍狗。聞者絕倒。

嘉靖丙戌刑部趙尚書。乃費閣老同年也。每投謁費書年晚生。先君時為庶吉士。同館屠公應坡謂先君曰。趙老真神童。問何故。云費鵝湖二十作狀元。年最少。今渠稱年晚生。非神童而何。相對撫掌。在當時乍見。猶譏笑之。是後則不以異為矣。

劉偉者。陝西朝邑人。為御史陞兗州太守卒。且若干禩矣。忽往來於山西省城。人呼為劉御史。或為具飲食。即咬之。夜莫測其宿何所。已而潘臬諸公皆知之。劉同邑韓尚書邦奇。將為叅議。語蔡憲使天祐曰。劉公吾父友也。吾少常見之。死久矣。今何以尚在。欲訪之而無由。蔡曰。當遣人要致之。一承差在旁曰。非劉御史乎。某識之矣。遂令往。劉聞召即至。二公先待於布政司。劉戴斗笠野服而入。諸公延之上坐。謂韓云。與君契濶多年。韓與言其身後家事。對曰。凡子所言。吾皆知之。至於吾所知者。則子不知也。令弟三哥。綁曩官於此。因其易言。故不欲見君。慎言者。吾將有以告。因握韓手與密語者久之。曰。願無泄也。還坐。眾問之曰。公一向山中。有何所得。曰。但能相耳。蔡曰。然則視諸同僚。誰先陞。曰。子問誰先陞。即子先矣。時張僉事某。忽發問曰。公既死。安得更生。曰。我却不死。汝到要死。遂散。無幾。蔡陞都憲。張病死。後有道士至劉家。曰。老師父令傳語。這番真个死矣。從是不復見於山西云。韓秘其語。不肯告人。此蔡

對魏莊渠言者傳
闕異辭此為實錄

山東東平州有張某者年八十餘不知所之大司馬王公憲幼時聞其名後公總督三邊一日張投刺請見公喜迎入視其狀貌非常人也問從何處來曰故鄉來具言鄉里近事留飲甚歡叩其長生之術不答止之宿云坐而假寐久矣公乃設坐於別室居之中夜聞震雷驟雨不以為意平旦入室祇見髮膚委地几上大書九轉方成四字公驚異取其髮膚瘞焉。

朱叢衣者

形類玄妙觀何叢衣像故人以是呼之

長洲人平生敬呂純陽朝夕懸像以拜朱一日病死

到一處壯麗如王者居闕門左右大書兩語云日月閻羅府冰霜業鏡臺入跪中庭見堂上冠冕赭袍者坐閱簿書許久謂朱云汝陽數未絕亟去既出不識所向遇道者儀容髮鬚呂公像指一路曰由此可歸慎毋顧後歸當食我櫻桃從其言得生時已仲夏覓櫻桃不得乃以密浸者供焉朱又活數年死其子乾為予言之

吳城東有回道院中塑回道人像隔牆賣麩家一日有道裝者至食數盃麩趨入道院願謂主人曰來償汝錢隨使童子索之眾道士云今日無人外出亦無外來者安得有此童子未信忽仰見塑像指曰即賒麩道人何嘿嘿耶眾視其唇有麩為之駭

異神仙游戲域中。其變化不測如此。

嘉靖間。荆王夜夢人云。補我衣裳。當保佑王子孫。王曰。汝何物人。曰。但張目而視。側耳而聽。當自知之。覺而不識。所謂一日偶閱畫。見觀音像。頓悟神語。曰。張目而視。非觀乎。側耳而聽。非音乎。府旁有觀音閣。王往視之。棟宇毀壞。塑像為風雨剝落矣。亟命修飾。立碑記之。

長洲陸世明。俊才藻思。聲稱藉甚。舉於鄉。赴省試。下第。歸過臨清。鈔闕錯認為商。令納稅。陸即書一絕呈主事云。獻策金門苦未收。歸心日夜水東流。扁舟載得愁千斛。聞說君王不稅愁。主事見詩。驚愧。急迎入。欸贈甚厚。金陵一妓能詩。善鼓琴。以月琴自號。世明過其家。口占點絳脣贈之云。三尺冰絃。夜深彈破青天竅。意中人杳。只有清光到。雲雨無緣。總是相思調。愁懷抱。嫦娥心照。訴與他知道。妓求室中春聯。即援筆書云。半窗花影人初起。一曲桐音月正中。妓讚誦不已。徐言中字恐不如高字。世明欣然易之。

先君幼善屬對。錢漕湖先生秋日過家。指庭中樹曰。秋聲在樹鳴。金鐵先君即對云。山色當窗卷畫圖。謝樂全見其目秀。言聰明露在眼上。先君應聲云。錦繡羅於胸中。

時年甫六七歲耳稍長同陸象孫看兩客對奕飲酒象孫謂客曰圍棋賭酒一着一酌客無以應先君云何不對坐漏觀書五更五經他若臣作肱股耳目對予敷心腹腎腸五事貌言視聽思對七音宮商角徵羽此類甚多不能悉記是時有蔣壽者年十一為府學生遇 聖節赴玄妙觀習儀巡按某御史見二鶴飛集三清殿命之屬對云三清殿上棲雙鶴壽隨應以五色雲中駕六龍御史驚嘆曰他日必人中龍也後壽竟夭歟惜哉

歐陽中丞重江西廬陵人巡撫雲南不給軍糧為眾奏聞奪職歸過公館驛遞中必題詩壁上大抵怨望之辭也時年甫四十稱涯翁書有無名子書二絕於其書後云怨辭隨處滿垣飛聞道先生放逐歸四十稱翁非太早人生七十古來稀醉翁千古號文宗此日涯翁姓偶同却想齊名就克老世間安有四旬翁先君過貴陽某驛見此詩於廳壁上近考

廬陵謫游號醉翁年正四十作詩者未知也然中丞之竊此文宗誠可誦

正德某年夏有龍墮於陝西之乾州其長數十丈目光如火開合閃閃可畏四足據地而行五里許得井水飛去居民皆見之後其村多疫死亡不祥也

嘉靖己丑七月二十八日吳江十一都油車巷徐沉家庭中忽陷一穴內明如燈風

雨頰作穴中飛出一龍自南去。牆屋無損。

甯波陳十三老人者嘗病瘧。經年不瘥。有人教以置虎皮鎮之。乃坐卧一虎皮十載而病如故。後忽蒙虎皮夜出。化虎食物。每銜畜豕至家。家人利其所有。不問也。一日自外負一人股至。其姥懼曰。老賊作怪矣。操梃伏門外俟焉。見其蒙虎皮欲化。即出擊之。時一手尚未變。遂躍去。竟不復還。自後山行者。往往見一虎。前一足尚是人手。有知者。則呼曰。陳十三老人。吾汝隣也。莫作惡。虎聞之。弭耳垂尾而去。其不識者。乃食之。如是者數年。一夕暴雷。山中震死一虎。衆視之。即人手之虎也。

貴州平越山寨苗民。有婦年可六十餘。生數子矣。丙戌秋日。入山迷不能歸。掇食水中。螃蟹充饑。不覺遍體生毛。變形如野人。與虎交合。夜則引虎至民舍。為虎啟門。攫食人畜。或時化為美婦。不知者近之。輒為所抱持。以爪破胸飲血。人呼為變婆。咸庚寅。先君寓其地。聞之。從游諸生云。

張漢卿。四川人。精於紫微數。游京師。推人休咎。輒奇中。夏閩老尤重之。時禮部侍郎缺。吏部推翰林餘姚謝公丕。石首張公璧。夏問二公誰有點。對曰。皆有點。五日後旨下。當自見。夏公笑曰。焉有是事。果如期得。旨。謝陞禮部侍郎。張陞太常卿。仍兼

學士各轉一官。若皆有點云。遂甯席公春。以禮侍轉少宰。漢卿謂人曰。不出兩旬。席必去位。既而與汪冢宰鉉有隙。為其劾奏免歸。纔十八日也。費鉛山赴召。復登首揆。李任丘位其次。從張叩之云。三月閣老。豈久壓公者耶。費一夕暴卒。計入閣至死。九十有一日耳。夏每問微蘭之期。漢卿依違而已。私語人曰。身且不保。奚啻無兒。後果遭戮。

吏部之權。俱在北曹。南曹殊落莫。惟考察年南京官五品以下。黜調皆在其手。聲勢赫奕。過此則如常矣。都下謠曰。今日南京真吏部。明朝吏部又南京。

工部居六曹後。仕進者固冷局視之矣。嘉靖間興大工。添設部官。數倍曩時。營繕司尤盛。郎中多至十餘員。得驟陞京堂。或有先賜四品服色者。人始慕之。而為語云。馬前雙雙馬後方。馬督工郎。

六部署郎中員外在司。與郎中員外同坐。見堂上官。亦並立。惟服色食俸。猶六品曹司。為之語曰。有得坐。有得立。無得穿。無得喫。

刑部吳尚書山。淞陵人。少時其父尚書公洪。使祈夢於九仙。以卜其終身。得一語云。三山備到福星堂。莫知云何。明舉進士。累官福建按察使。至三山驛。謂夢語兆於此。

矣。及為江西布政。其年六十。藩臬為公祝壽。結一綵樓。扁書福星集慶四大字。公見之。悵然曰。吾止於此矣。尋擢中丞。巡撫河南。坐事降浙江。參議十年。間累遷。至尚書。以為夢不足憑也。後讞郭勳獄。上怒其愆期。免官去。將抵彭城。病卒於利國監驛。昇尸到石山驛。兵備副使屠大山為之斂於驛堂。其扁正名福星。夢語始驗。奇哉。

汀州劉太守炯。蘇之長洲人。為南京刑部郎中時。夜夢渡危橋。失足墜深淵中。中有一門。榜曰積善之門。有金甲人引之入。其境界非人間世也。劉公伏階下。冕服者坐殿上。謂曰。汝大有福人。壽至七十五。何為求此。劉公言其故。乃命侍衛者。以金爪擊其背。遂覺。汗流被體。心竊怪之。翌日散衙回。偃息於牀。忽有泥墜其面。意鼠跳梁。起視無有。如是者再。遂不復卧。頃之棟折牆倒。正壓其牀。始數夢之神也。後公自汀洲罷官歸。優游康甯。享子孫孝養者二十餘年。果七十五而終。仲子璧。舉進士。授浙江東陽知縣。在任得疾。疾且革。遂投檄歸。到錢塘。忽瞑目。半日始蘇。語其子曰。適至一所。樓下人引我見樓上官人。官人手一簿云。此前數也。當使知後數。命吏又以一簿示我。壽至於此矣。官人復云。汝只該鄉舉。因中進士。減汝十年。抵家浹旬。死時年四十六。

公之孫計頌述公夢神謂其壽數定七十五非統言七八十故定之士辰記

帶城橋錢氏媪。夜夢黑衣人叩首曰。阿母救我命。只須十八文錢。當增母壽一紀。既覺弗解。晨起見人持一盃過門。問欲售錢幾何。云十八文。媪悟。如數買之。隨放於河。是歲遺疾幾殆。後果十二年而亡。

陳湖王木。正德間自京師歸。與浙商陳某者同舟。相與甚厚。覘其囊有金。遂萌惡念。乘其中夜起溺。擠之於水。得金三百餘兩。用致饒益。至嘉靖某歲。已踰廿年矣。木忽遇陳於城隍廟前。頓首言死罪。無可說歸家日。惘惘自嘆云。此事罷不得。終須還他半載。後忽自賣瓦礫於兩袖及視中。沈水而死。

俞翹者。中書族叔之僕也。平生專以假銀騙人。戊戌夏月。至常州貿易。經賣羊家。欲以銀一兩三錢買四羊。主人求益弗許而去。明日主人將出。囑其妻曰。昨買羊者倘再來。稍增價可與之。翹果矚其夫之亡也。以一兩八錢買去。夫歸怪其增價太多。視之乃假銀也。怒罵其妻。妻忿縊死。夫痛其妻。亦縊焉。至七月間。翹被迅雷擊死。陳湖濱。四羊亦死。蓋翹屍上。遠近快異其事。夫彭明威以警人若此。

南京刑部典史王宗。福建人。一日當直。忽報其妾為人殺死舍館。宗奔去。旋來告。尚書周公用發河南司究問。欲坐宗罪。宗云。聞報而歸。眾所共見。且是婦無外行。素與

宗驪何為殺之。考掠累日。終無異辭。既數月。都察院會審。事檄浙江道御史楊逢春。楊示約某夜二更時後鞠王宗獄。如期鞠之。猝命隸云。門外有覘視者。執以來。果獲兩人。甲云。彼挈某伴行。不知其由。乃舍之。用刑究乙。乙具服。言與王宗館主人妻亂。為其妾所窺。殺之以滅口。即置於法。而釋宗。楊曰。若日間則觀者眾矣。何由踪跡其人。人非切己事。肯深夜來瞰乎。由是舉稱神明。一時聲振都下。

北門橋朱某妻顧氏。每夜有巨人來共寢。日漸羸。家人語婦云。取其佩戴之物。斯知何怪矣。婦俟與交時。拔其頭上一件。藏於席下。明視之。乃紗帽展翅也。朱驗之。土地祠中判官。正失此翅。具報兵馬司。轉申刑部。問判官杖罪一百。成招。搜像至中衢杖碎之。中有血水流出。顧氏得無恙。右二事已亥年族兄儼若卒業南雍所目擊者

長洲易外郎。己亥年家中怪作。所藏骸核。嘗移置他所。罄之。但聞空中云。我食某人矣。時有大磚擲下。然終不傷人也。姻家曹某至。戲曰。若能取我帽乎。言未既。帽忽去。頂空中曰。汝信乎。曰信矣。與之索帽。云在灰堆上。可往取之。果然。易末如之何。聞杭州某道士有異術。致之求治。道士曰。是鬼物也。憑陰人為祟。君能棄之否。易曰。妻女之外。一如法旨。道士曰。定是君家奴輩。遂書符化之。有婢在厨下。直飛墜其身。曰。即

此人也。亟驚之。斯無患矣。易呼婢問之。云有一人夜夜來與兒同睡。且戒曰。吾與若好也。倘洩於人。將不利汝兒。恐故弗敢言。易即責婢與某甲。而怪隨擾其室。乃以婢歸其母家。後不知如何。

錢鼎陸墓窆戶也。負官銀遁走南京。或言不可居。遂下舟陽。欲適無錫。依故人某。有老人求附舟。遂載之。與共寢餽。老人道錢禍福。已往皆驗。乃告以避難之故。曰。無錫正爾息肩處也。不得故人力。自有好相識。經冬難必扞矣。翌日抵無錫西門。老人云。感君雅意。當奉卮酒為壽。要入酒家。劇飲而別。錢追問其姓名。曰。問何遽也。拋離火宅三千里。屏去門兵十萬家。錢未省。叩之。不答。但云。會悟尚有日。請期。曰。七十三。又云。主器將傾。他何足問。徑去。錢投故人。故人兩目俱瞤。家徒四壁。立弗能留。送到某神祠。祠近馮僉事變別業。馮過道士與錢相值。談及內養。其素好也。因錢知梗概。意殊善。問其來由。以寔對。曰。此間良可避難。吾願為東道主。遂館之。別業殷勤甚厚。錢每見馮來。則瞻拜一畫像。甚虔。乃謂馮彼何人斯。公敬之若是。曰。此遼上相劉海蟾也。後為列仙。其自詠云。拋離火宅三千里。屏去門兵十萬家。錢始悟。羈老人乃海蟾也。歲暮還家。官事甫了。而長子死矣。至嘉靖甲辰。其年七十有三。春日在北寺前放

七。 鶴一翁拳其背曰汝在斯耶顧視之已遠數步忽不見追想即此老人也居無何病

陸墓陳玄齡幼習舉業年十六督學使者將按部至吳欲赴縣投牒入齊女門疾走

如飛從者追之不及莫測其所往也數月後始歸手持藥一瓶意甚珍重且云仙人

挈我南游武林山中惠服此丹必登仙矣家人謂之癡弗以為異至二十歲取妻不常

內寢妻亦弗樂近或云有採戰之術妻不堪耳甫及三載忽一日發狂大呼升屋跳牆父母弗能

止乃繫其手足閉之空室中潛自解去遂為乞丐時仰天自笑遇人輒歌詩拾敝扉

索賈負之日纍然行市中夜宿於齊門下塘土地祠然不與羣丐共卧每詣其勇夷

亭姚氏與之食飲不辭贈之衣即授同伴終不易其故服也甲午十月若有病容謂

羣丐曰上帝召我望日當往眾哂之及期焚扉灰分遺常周己之人曰用滌垢衣最

潔遂北面祠神而立逝焉受灰者共買棺斂之如言滌衣咸得碎銀於灰中多寡不

齊適以報其惠之厚薄也陳里人自福建歸言在彼見之正玄齡死日始知其尸解

云。

裴慶者素貧賤其妻與某甲有姦遂棄妻與甲而行乞焉夜則宿於憇橋巷某氏檐

下蔽身布衲不滌如新日在吳市中而人有見之於武當山者談人禍福多奇驗或問之曰汝必有所授則云陳三癡謂玄齡也張真人問其名召居龍虎山巡撫高都憲公韶往問休咎裴不答但歌歸去來辭數句而已高後果被論罷官夏閩老家居住訪之裴倨坐一杌弗起但云汝自去做汝官問以子息則曰且管自家結果遂併杌仆於地夏公怪而趨出不久召用竟以河套事死西市甲寅春忽謂真人曰六月二十日吾去矣真人以為他往至期無疾而逝

浙江開化縣有銀杏一株巨甚其實從幹上墜腫處剖出不由枝生也取其旁幹接他本仍實於枝上人目此為胎生銀杏誠異種云

湖廣保靖宣尉司彭九霄之母有玉戒指中映一蟻閃動足厯厯可觀錢塘金編修家有一金相猫眼銀凡正午時眼如線過而復圓兩物乃天下奇寶也

蘇州韋指揮袁英壬寅正月廿四日往吳江見巡按舒御史汀還至寶帶橋天晚陰雨濛濛一人絨帽藍衣足穿雲履立水濱求載許之既登舟即據上坐言論鑿鑿可

聽時舒公嘗密遣人訪豪惡英意此箇中人也殊畏之要至家留款其人使袁僮奴搗鼓飲五十樽不醉酒道英父子陰事甚悉為之驚悚逼其體有異香到五更纔和

衣就寢。旦起辭去。英命一卒潛尾。其後至太平橋。猝回首吐吐云。若隨我何為。遂入賣線沈家。卒歸報英。正發狂持刀欲殺人。復往問沈。云未見有人進門也。廿六日。英謂妻子曰。我將死。及吾生時。祀我。遂坐索飲食。召其狎友王李二生共享之。曰。與君輩永訣矣。眾以為妄語。翌日忽走出。家人追之不及。竟縊死葑門鋪中。莫知遇何物鬼怪也。

是歲北虜犯太原。殺戮甚慘。吾蘇唐同知頤。太原陽曲人。其家一僕遇虜被刃。而喉未斷。捧頭奔回。縫以油線。得不死。但能仰而不能俯。唐為文衡山言。

山東僉事黃縵。浙之鄞縣人。有女年及笄。患瘵疾。死時以久病髮腫。不授櫛。草草殯歛。黃亦不及詳視也。葬之祖墓旁。每陰雨。人望見其女蓬首。而足曳紈尺許。坐於冢前。一日。坟丁妻遇之。驚走。女呼之曰。來。可語吾父。吾爾親生女。不為梳頭纏足。使我形狀如此。何以見人。他日。其夫亦見而言如初。曰。吾嘗苦汝妻。何惜一開口乎。今汝當亟言之。其夫往告黃公。公未之信。後欲改葬。啟棺。果然。遂為整其頭足。重瘞之。從祖兄次孫家閭門下塘。有琴川吳氏。僦其旁室居焉。其女美而知書。解詞曲。雅好樓居。倚闌吟眺。甚適也。既而徙上塘。過期不偶。憂思成疾。死。死後五年。次孫延崑山

虞秀才廷臯教子。館於此樓。一旦戲謂虞曰。此吳家小娘子所居。餘香猶在也。今君孤眠長夜。得無憐而至乎。虞正年少。聞之心動。迨夜入房。則此女在燈下。遂神迷心蕩。相與綢繆。自是無夕不至。後雖白晝。常見其在旁。久而病瘵日甚。其父亦授徒他處。亟來叩之。不言。固問。始吐實云。陸次孫害我。父驚惋。具舟遣歸。女已在舟中矣。歸而坐卧相隨。妻雖同狀。弗能問。未幾竟死。寔己酉三月某日也。

翟永齡滑稽多端。天池季父嘗記之矣。近聞無錫鄒氏有字光大者。連年生女。俱召翟燕飲。翟作詩戲之云。去歲相招云弄瓦。今年弄瓦又相招。寄詩上覆鄒光大。令正原來是瓦窰。

蔣思賢暨子某。以畫像名吳下。暇日。父子交相畫其貌。皆不肖。里人作詩誚之云。父傳子神傳。不像子寫父。真寫不真。至親骨肉尚如此。何況區區陌路人。

府學生金用元。賓才敏。善詼諧。每朝入詩歌。及俳語。頃刻立成。人爭傳以為笑。若禿指賦。其最著者也。一日在文衡山內翰坐。浪謔訓蒙師潘老。潘愠曰。吾有一語。爾能對。甘受爾侮。金問之云。王大。夫。昆。李。築。牆。一。土。蔽。三。人。之。體。金應聲云。潘。先。生。父。子。沐。髮。翻。水。灌。兩。牛。之。頭。坐。中。為。之。大。噱。

衡山說其尊人温州公少日夢到一僧寺。歷堂宇數重。有屋三間。屋後一塔。其間巍坐一人。見公來。不為起。公頗不樂。問之。人云。宋歐陽文忠公也。後為南京太僕丞。公署在滁州。滁故六一桐鄉也。暇日游一寺。境界似夢中。而塔院塑文忠像。亦儼若夢所覩焉。衡山又自說往年常夢入道院。中有道士請作青詞。辭不獲。勉為作十數語。道士持誦於神前。私問旁人。此道人為何。曰。虞伯生也。俟其宣畢。揖之。相與談論。請曰。許左丞有壬。先生故人也。其文集何以不傳。虞公曰。左丞彙厄於火。是以湮沒耳。語訖而寤。甚訝之。他日至相城沈啟南家。閱書畫。展一軸。正虞伯生畫像。乃道裝也。適有送許公集者。讀序文言。集嘗被焚。撥拾成此。追憶前夢。為之惛然。

先君平生多奇夢。嘗欲自記之。而未果也。辛亥秋。寢疾。至臘月廿三日。疾革矣。謂不肖曰。予疇昔之夜。夢至一所。殿宇如文華規制。王文恪公由東序趨出。見予。意色甚喜。遂携手上階。云。子餘今來。吾不落莫矣。且問高學究竟何如。予未及對。公即朗吟云。從來我被多聞悞。却恐多聞又悞君。模樣云云。吾殆將死矣。語未更端。忽有錦雞飛集闌干。先君曰。野鳥入室。主人將去。乃今驗之也。越三日而沒。

右說聽二卷。舅氏胥屏先生所撰。先生為外王父太常公。家子太常平生著書滿。

家庚已編則其少作也蒐奇括異海內同好者爭傳之先生雅喜裨官家言母有
奇文輒隨筆識焉久而成帙帙成而毀於火于時太常歿且五稔矣先生作而嘆
曰嘻斯可不成吾初業乎乃追惟曩時所記益以後記者編為是編禹聲請登諸
梓得而伏讀之微獨蒐奇括異足備庚己之遺即一談一詠而先輩風流才人逸
致具焉其間宏且鉅者直可補正史之亡而裨掌故之闕雖中壘說苑方駕可也
康駢而下無論已先生古心古行讀書之外舉無他好今老矣猶且矚手一編不
置他所論議甚多此特其一竊云萬曆辛卯秋月甥王禹聲百拜謹題

觚不觚錄

明 太倉王世貞弇州著

孔子有言觚不觚哉。觚哉。蓋傷觚之不復舊觚也。所謂削方為員。斲朴為雕者。茲之謂矣。又曰。吾猶及史之闕文也。有馬者。借人乘之。今亡矣夫。其作春秋。脫左驂而賻。蓋皆寓微旨焉。余自舞象而小識人事。踰冠登朝。數躡數起。以至歸田。今垂六十矣。高岸為谷。江河下趨。觚之不為觚。幾莫可辨識。閒居無事。偶憶其事。而書之大而朝典。細而鄉俗。以至一器一物之微。無不可慨歎。若其今是昔非。不觚而觚者。目固不能二三也。既成而目之曰觚不觚錄。

國朝邊帥。無加宮保以上者。以官至左都督而止。或斬級功多。則加祿賜蔭。又多則封侯伯。又多則于侯伯加歲祿。其又多則許世襲。或至伯而後加宮保。嘉靖中。閣臣不諳典故。始以太子太保。加大同總兵梁震。繼以太保。加大同總兵周尚文。而錦衣緹帥亦薦加少保。以至太保矣。夫總兵一兜鍪將也。緹帥三衙杖士也。而冒燮理陰陽之寄。不亦重辱哉。是可釐而正也。

隆慶即位。恩詔。文職五品以上。以禮致仕者。進階一級。于是致仕尚書左右都御史

皆腰玉。侍郎至按察使皆腰犀。僉都御史至知府皆腰花金。而僉事郎中府同知皆腰金戴褐。蓋事稍稍聞于內。一時入座諸公尤不平。謂吾輩未滿九載。尚不得玉而彼坐不稱而退者乃玉耶。于是言官申明其事。謂尚書未滿初考進一階止。當曰資政大夫。滿考投資政者止。當曰資德大夫。投資德者方可曰榮祿大夫。得換服色以下皆倣此。因當行天下裁正。而腰玉與犀金之徒如故也。今竊不敢以為然。以為階者所稱大夫也。級者品級也。必隔品而謂之級。若只在本階。則所謂陞一級與陞俸一級者。當何處耶。且考之祖宗恩典皆然。間與故相華亭公及之。公即草是詔者。答曰。公言是也。當時實以為國家曠蕩之恩。第所謂被彈劾考察致仕者。不當援耳。自後新鄭草赦詔。第云進本一階。則林下之臣被恩者無幾。而諸公之自相貴者復自若也。一南兵部署員外主事以考察去者。一知州被革者。忽兩進其階。曰朝列大夫。一府同知後恩詔半歲而考察去者。亦署曰朝列大夫。金紫塞徒。見者扼腕而無如之何。所謂知州者。以進階高會。其乃弟亦大僚也。忽莞然曰。恨世宗不數赦。則吾兄且腰玉也。又聞舊一翰梁指揮使。凡四覲恩詔。輒刻一牙章。最後曰特進光祿大夫柱國。此二事。可為進階者助捧腹。

又國家于大計京察尤重。其責貪官尤深。故每過恩詔。于冠帶間住致仕為民復官冠帶者。必曰不係朝覲考察。而壬午詔草。當事者矯前人之刻而收人心。遂除此語。而橐金如山。草芥人命者。擁冠蓋揚揚閭里間矣。

南京六部都察院之長。嘉靖以前。有乞休及起用而辭者。往往奉旨不允而稱卿以留之。惟下吏部議覆。不得不斥姓名為去留耳。嘉靖之末。迨於近世。惟林尚書雲同一次稱卿。且有褒語為其恩。其他即吳萬二公。皆故大宗伯。吳又位少保為三孤。而皆下之吏部。直斥姓名。反以為故事。殊不知其非故事也。

成化以前。諸邊掛印總兵。雖都督僉事。未有不稱卿者。正德以前。侯伯為總兵。亦未有不稱卿者。近年則以李賓遠之開邑封。威將軍之位三孤。直斥姓名。重者僅稱爾。恐亦非故事也。

嘉靖遺詔。卹錄言事得罪諸臣。雖做改元詔旨。最為收拾人心機括。惜乎吏部奉行。之臣。未諳典故。倉卒奏請。不能無舛。如熊太宰浹之加少保。少保三孤也。非部所宜定議也。此一舛也。得罪之臣。當酌其事理之切直。心之赤誠與否。而後劑之。今但以得禍輕重為主。致郭豐城之卹。反優于楊富平。此二舛也。翰林春坊。自有本等階職。可

贈今擬贊善修撰皆為光祿少卿是外之也此三件也都給事御史止贈通叅大理丞其有遺誤而撫按題請者起二級太常少卿致仕官亦如之此四件也自後言官所舉尤為掛漏如石文介瑤本以少保致仕而稱太子少保彭襄毅澤本以致仕加少保而亦稱太子太保以故復贈少保林貞肅俊以致仕加太子太保而止稱刑部尚書以故復贈太子少保今獨林公改正而已楊文忠一品十二年滿加大傅固辭而止又與蔣文定俱封伯亦固辭而止楊不當僅加太保蔣不當僅加少師此則執政之誤也

閣臣兼掌部院非舊規也焦泌陽掌吏部不過數日李餘姚亦不過數日而已嚴常熟以候郭安陽得兩月餘嚴分宜徐華亭之掌禮部亦以候代故張永嘉之掌都察院未嘗不推代也惟高新鄭託掌吏部起而入與閣務趙內江亦遂兼掌都察院而局體大壞矣高以吏部為鳳池至進首輔亦不忍捨出而斥陟入而報允真足寒心雖免起故吏部楊蒲坂以塞人口不還其舊物而置之兵部亦可怪也此祖制之大變也

高帝不欲勛武臣發習騎射故雖公侯極品而出必乘馬上下不用牀杌嘉靖中以

肩輿優禮部。明國朱成公。扈駕南巡。給輿。後遂賜常乘。而崔京山。張英公。卽謝二都尉。方安平亦因之矣。夫勛戚至保傅。且篤老可也。陸武惠。朱忠僖。以錦衣緹帥。而用內壇供奉。亦得濫筭。却恐非高帝意也。

余于萬歷甲戌。以太僕卿入陪祀太廟。見上由東階上。而大璫四人。皆五梁冠祭服。以從。竊疑之。夫高帝製內臣常服。紗帽與羣臣不同。亦不許用朝冠服及幘頭公服。豈有服祭服禮。曾與江陵公言及。以為此事起于何年。江陵亦不知也。後訪之前輩云。嘉靖中亦不見內臣用祭服。而考之異朝寶錄。皆遣內臣祭中霤之神。此必隆萬間。大璫內遣行中霤禮。輒自製祭服。以從祀耶。惜乎言官不能舉正。坐成其僭妄耳。親王體至尊。于中外文武大臣處。投刺作書。有稱王者。有稱別號者。不書名。惟今嘗王一切通名。雖獲恭順之譽。而識者頗以為非體。自分宜當國而親王無不稱名矣。至江陵而無不稱晚生矣。又當其時。襲封者無不稱門生矣。江陵自葬父畢。還朝。過襄陽南陽二府。二親王來迎。報謁留宴。彼此具賓主上坐。長揖無毫髮等差。若陶仲文之過徽。其王自跪稱弟子。俯伏吮鞞鼻。宴會必侍坐。送必候升輿。尤可怪也。趙少保督軍過其家。停輿日以一日坐台。兩日坐家。司道守令將帥候謁行禮。每出

候客。必用二劄子。手立前不移足。胡少保罷官歸績溪鄉居。每入邑。必用鼓吹旗幟前導。謁邑令。肩輿至堂。皇始下。若江陵歸葬畢。兩道請閱操。吉服上坐。一用總督軍門禮。備花紅賞賚。累數百金。亦桑梓間怪事也。

大朝賀文武羣臣。皆具朝冠服。獨錦衣衛官衣緋綉袍紗帽靴帶。蓋以承旨捕執人。百年來未之改。獨陸忠誠炳加保傅。遂以己意製朝冠服。歸然本班之首。當時莫敢問也。

今上初重張江陵于御札不名。以後傳旨批奏亦多不名。而羣臣諛附之。至于章疏亦不敢斥名。第稱元輔而已。夫子之於父尚猶君前臣名。故樂鑿御晉侯而叱曰書退。此禮也。江陵沒餘威尚存。言官奏事欲仍稱元輔。則礙新執政張蒲坂。乃曰張太師。至有稱先太師者。蓋未幾而穢詈無所不至矣。

六年一京察。為成化以後典章。其它有以主上初即位而考察者。有以災異而考察者。至于考察科道。則或以輔臣去位而及其黨者。惟嘉靖丙辰太宰李默下獄。命輔臣李本掌部事。悉取六部九卿自尚書而下。至尚寶丞及六科十三道分別而去留之。蓋上以星變欲除舊布新。而分宜緣此用。仲其恩怨也。其後大臣有起用者。而小

九卿及庶僚則不振矣。隆慶之四年。忽有旨命吏部高拱考察科道官。高乃上請與都察院同事。報可。蓋高之去實為科道所聚劾。至數十上。至是欲盡其忿。而會有疏小觸上意者。故托中貴達之上。甚忿之。大者削。小者謫。蓋高雖敢而猶不獲伸。及江陵沒。言路稍稍白其冤。于是太僕少卿魏君獲補南大理丞。石給事中周君獲遷吏部左。而少卿張御史周亦以次起矣。蓋人知起考察官之非例。而不知考察之非例也。萬歷之庚辰。南京兵部主事趙君世卿上疏。極言時政之弊。皆刺譏江陵。江陵大怒。旬日間。吏部為升楚府長史。明年南京考察。遂斥之。壬午。江陵歿。明年其事敗。言官乃交薦趙君為禮部郎中。此起決不可已。而考察之典章為之一變矣。此二事皆破例。故特著之。

左右春坊中允入閣門內揖。出用雙導。左右贊善從六品亦然。而翰林侍讀侍講品故同。中允然以本院屬官。故揖則中庭。出則單導。獨至修書講筵。至兩京試則皆講讀。先而中允後。二百年故事也。萬歷己卯。南京鄉試。忽以中允高啟愚先而羅萬化後。知者謂江陵善高公。故至為之易成法。不五年而高至禮侍。以首題舜命禹為言。官所論。以江陵有不軌謀。而高媚之。至奪官著後焚告身。當時使用故事。羅居首。必

不出此題。即出此題。而高却得無恙。一抑一揚。禍福倚伏。非人所能為也。

詹事府詹事。班在大理卿下。累科試讀卷可考。惟宏治九年謝文正遷以內閣故班副都御史上。近年吾鄉申少傅以宮詹掌翰林。亦班其上。莫有與之爭者。自是遂為故事矣。

故事吏部尚書體最重。六卿以下投刺皆用雙摺刺。惟翰林光祿以單紅刺相往返。至轉禮侍。則如他九卿禮。彼此皆用雙帖。而此故事廢矣。萬歷初。吾鄉王公元馭以少詹事學士。而仁和張公為吏部。以一單紅刺投之。元駁拒不納。必改正乃已。蓋確然能守其故。獨念當時無為元馭告者。不必拒不納。次日亦以單紅刺刺之。尤為當也。

余少從家君于京師。觀朝天宮習儀。時吏部熊公浹以太子太保居首。工部甘公為霖以少保次之。兵部唐公龍以太子太保又次之。若以三孤為重。則甘不宜讓熊。若以部序為重。則唐又不宜讓甘。蓋兩失之也。其六部尚書。雖加太子少保。必以部銜定序。第以皆正二品故耳。而甲戌朝班。則工部朱公衡為太子少保。以先貴據吏部。張公幹上。張亦無如之何。蓋一變也。

相傳司禮首璫與內閣刺。用單紅帑。而閣內用雙紅摺帖答之。然彼此俱自稱侍
生無他異也。近有一二翰林云。江陵于馮璫處投晚生刺。而呂舍人道曠云。在制勅
房侍江陵者三載。每有投刺。皆從本房出。無所謂晚生也。豈于致謝求托之際。間一
行之。為人所窺見耶。

相傳六部尚書侍郎大小九卿于內閣。用雙帖。報之單紅。五部及九卿。于冢宰用雙
帖。亦報之單帖。今舉進士時尚然。及以太僕卿入都。則惟內閣報單帖如故。而六部
自仁和張公以下。皆以雙帖見報矣。余等于各部屬中書行人等官。皆用雙帖往返。
不知起自何時。殊覺陵替。所費紙亦不少。

翰林舊規。凡入館而其人已拜學士者。即不拜學士而先登甲第七科者。投刺皆稱
晚生。餘不爾也。余入朝見分宜首揆。而華亭次之。其登第相去六科。分宜又不為學
士。華亭首揆而常熟新鄭次之。科第相去又六科。華亭又不為學士。投刺俱稱晚生。
已小變矣。至江陵首揆而蒲坂次之。相去僅二科。而亦稱晚生。何也。聞局體自此大
變矣。

余欲行萊州而過故太倉守毛槃。乃故相毛文簡公紀子也。當文簡以少保居內閣。

而楊文忠廷和。梁文康儲為少師。嘗出二公拜刺。乃色箋。僅三指濶。中云楊廷和拜而。而梁公則稱契末。或稱老友。余怪問之。文簡豈二公門人耶。曰非也。毛公視二公。僅後三科。其答刺則曰侍生。亦僅三指濶而已。三十年來。次輔投首輔帖。無不用雙指者。而首輔報之。亦絕不見有直書姓名及契末老友等稱。

正德中。巡撫勅諭。尚云重則參題。輕則發遣。巡按御史及三司處。洎其後。漸不復然。御史于巡撫。尚猶投刺稱晚生侍坐也。辛卯以後。則僉坐矣。尋稱晚侍生正坐矣。又稱侍教生矣。已而與巡按彼此俱稱侍教生矣。已而與巡撫俱稱侍生矣。蓋由南北多警。遽擢既驟。巡撫不必者宿。御史多有與之同台者。又功罪勘報。其權往往屬之御史。積漸凌替。故非一朝也。

正德以前。都御史曾于都察院上任者。御史執屬官禮。嘉靖中。葉都御史曾于本院協管堂事者。尚執屬官禮。二十年來。雖管堂事者。俱勿論矣。

余初仕刑部時。尚書聞莊簡公甫去任。而屠簡肅公代之。其繫法為天下最。喻劉應何。猶能守而勿失。如淮安理刑。必用半年之外。曾經提牢過者。南北決囚三人。必于主事中。差資最深者。毫髮不敢亂。二十年後。有甫入部。而遽委理刑者。有越資而差

審決者。甚至有以私情借別部差者。有借本部。漸除名目不當差官而差者。此可歎也。

翰林分考會試。雖本經房而不係所取者。不稱門生。惟入翰林則稱門生侍坐。而至位三品以上不復叙。嘉靖甲辰吾鄉瞿文懿公景淳及第。而太保嚴公訥同考。皆詩經。瞿以齒長坐輒據其上。亦不投門生刺也。至乙未嚴公復入場。而少師李公春芳復于詩經中會試。亦不于嚴公投門生刺也。此皆不可曉。

百年前京堂翰林諸公使事還里。及以禮致仕。若在告者。謁巡按按察司兵道。則入中門。走甬道。巡撫布政司府州縣。則由傍門走東階。蓋以桑梓之重。與特憲者有分別耳。吾吳朱恭靖公希周最名為恭謹。然尚馳御史中門甬道。為提學胡直所強下階。胡嘗為余言之。余不敢對。近者寧波張尚書時徹欲馳撫按監司甬。遂至兩不相聞。而華亭董侍郎傳策馳兩道甬。亦退有煩言。今遂無此事矣。故事內閣大學士肩輿出。則六卿以下皆避。而吏部尚書獨不避。遇則下輿揖。余入仕時。聞莊簡公猶守此。與貴溪分宜二相偶遇而揖。二相不善也。莊簡去位。夏涪縣邦謨繼之。則避矣。吏部尚書與三品大九卿四品左右通政大理少卿遇。則皆下輿馬揖。其四品以下

同其長遇。則不避。獨行則多避。而自楊襄毅在隆慶初。以少傅為吏部尚書。位望俱重。于是左右侍郎。自本部外皆遠避矣。迄于今不復改。楊公之再起。以吏部尚書掌兵部事。侍郎有欲不避者。竟不敢。

太常應天光祿太僕皆三品卿。出乘輿而皆避侍郎副都御史輿。此最無謂。不知起自何代。大輿祖制不合。夫人廟同一班。出而避道何也。華亭董公傳策為太僕寺卿。不避侍郎輿。人以其先朝直臣。莫改難之。後竟不行。

余在鄭日。今馬中丞文煒時任荊州兵巡道。為余言前任某每江陵公之父封君某相訪。輒于大門外一拱而入。令人擁其輿。由中道進至儀門。復一拱。復令人擁其輿。進至堂。已從傍進。見即前堂延之正坐。而已侍坐。送亦如之。馬至第。任其由甬道而執主禮如常。自是封君不復候馬。使人傳問而已。又言江陵時有賜及父母。或誥命。皆令家僮私齎至家。封君于中堂跪聽。開讀。子孫列月臺。而道府乃又列其下。問作何處。余謂此更不可示人。其家勅也。非勅道府與詔赦也。但吉服至門。俟宣畢而後入賀可也。馬深以為然。當亦如所云行之。江陵聞之。亦不以為忤。

故事。巡按御史行部。必竣事而後與鄉士大夫。還往。當徐文貞公柄國日。其父贈公

在鄉賢祠時直指之陳姓者。三日謁文廟畢。即謁贈公。主於祠而後聽諸生講。講畢即造文貞第。謁家廟。設坐于堂拜之而後出。一時他直指皆效之。郡遂定為儀注。後直指溫見儀注大駭。泚筆去之。諭郡毋入此條。而身行禮亦不敢廢。嘗為余言如此。及文貞公謝政歸。直指無謁鄉賢祠者。而其訪文貞亦必待竣事矣。

二司自謁吏部都察院。庭叅有跪。而至于朝房私第。及驛傳印送。則惟長揖而已。內閣大臣。雖尊貴無跪禮。而江陵之奔喪。所經省分三司皆出數百里外。以謁。然跪者十之六七。未盡純。暨還朝。則先遣牌。謂本閣部所經。由二司相見。俱遵照見部禮。于是無不跪者矣。

三十年前。他郡推在吾州查盤者。州守與之抗禮。歡飲具賓主。或於門外下輿。小示別而已。邇來查盤他郡。推官至。州守入見。行跪禮。乃至以他事。或便道過州。亦必跪。雖宴會。稠疊。謔浪歡呼。必侍坐。不敢講敵禮也。有崑山縣丞劉諧者。由給事中考察。降而御史。委之盤查常熟嘉定。常熟令見之行跪禮。嘉定令禮之一如推官。惟不行跪。而劉尚怏怏不悅。恣流言。真可謂倒置矣。

余自嘉靖丁巳戊午間。為青臬。前後所周旋三撫台。劉公來。傅公頤。丁公以忠。皆知

己丁公又同寮。而是時撫臣體尚尊。劉公三次詢問事體。丁公亦如之。皆手書不具名。惟丁公一次用單紅帖而已。戊辰起兵備。大名撫台為溫公如璋。後余三科進士。亦舊知也。手書論事。無所不及。而筆益潦草。亦不具名刺。轉參政。浙江谷公中虛為撫台。交淺而知予深。每有所詢。輒另具姓名。雙摺刺余以為奇。歸田數年來。乃知少所不用刺。而稱公稱丈。屢屢至。有施之郡守以下者。雖能得其歡心。而事體日益褻矣。

兩廣二司。初謁總督。行跪禮。蓋襄毅之威劫使之。其後迄不能正。嘉靖末。應侍郎積為總督。此公守常州。遵憲綱。不肯跪。御史有山字太守之目。雖見憎白簡。為天下所稱誦。至是人有以風公者。不得已聽之跪。禮遂廢。陝西巡按獨不遵憲綱。自下坐而二司夾侍左右。十年以來。一御史改正。就從憲綱矣。惟此二事不觚而觚者可紀也。京師稱謂極尊者曰老先生。自內閣以至大小九卿。皆如之。門生稱座主。亦不過曰老先生而已。至分宜當國而諛者。稱老翁。其厚之甚者。稱夫子。此後門生稱座主。俱曰老師。余自丙辰再入朝。則三品以上庶僚。多稱之曰老翁。又有無故而稱老師者。合不可勝紀矣。

內閣諸老縉紳于外稱呼亦不過曰某老先生而已分宜當國多稱之曰相公而華亭餘姚與同事則別姓以異之然不盡爾也至江陵晚年則直稱曰老相公而他皆別以姓矣

馮璫勢張甚固安武清以長樂尊父見之亦叩頭惟謹呼老公公馮小屈膝答之曰皇親免禮而已若駙馬叩頭則垂手小扶耳不為敬也

國朝文武大臣見王振而跪者十之五見汪直而跪者十之三見劉瑾而跪者十之八嘉靖以來此事殆絕而江陵歿其黨自相驚欲結馮璫以為援乃至言官亦有屈膝者矣

故事投刺通書于東面皆書一正字雖甚不雅亦不知所由來而承傳已久余自癸酉起官見書牘以指濶紅紙帖其上間書啟字而丙子入朝投刺俱不書正字矣初亦以為雅既而問之知其為避江陵諱也

正德中稱謂尤簡至嘉靖中始有稱翁者然不過施之于三品九卿耳其後四五品京堂翰林以至方伯憲長皆稱翁矣今則翰林科道吏部以至大叅僉憲郡守無不稱翁矣又其甚者部屬在外及丞倅司理亦稱翁矣此其諛諛關冗流穢人目固無

足道。而又有一種可怪者。往時于鱗與余頗厭惡之。與于與輩尺牘相聞以字。然不過知已十餘人。至于詩文稱字稍廣。然亦僅施之年位輩行相若者耳。今貧士書生不見錄有司。輸粟富家兒不識一丁。口尚乳臭。輒戴紫陽巾。衣忠靜衣。挾行卷詩題尺牘。俱稱于鱗伯玉。而究之尚未識面。

諸生中鄉薦與舉子中會試者。郡縣則必送捷報。以紅綾為旗。金書立竿以揚之。若狀元及第。則以黃紵絲金書狀元立竿以揚之。其他則否。萬曆戊寅。吾郡中相公入閣報至。撫按兵道創狀元宰輔字金書于黃旗。揭竿于門。入雲表。聞此公知之。頗不樂也。而不及正矣。又一大司馬子拜錦衣千戶。一大宗伯子入胄監。郡縣皆送旗。比之中式者。加壯麗數倍。

先朝之制。惟總兵官列營。始舉炮奏鼓吹。而吾蘇韓襄毅公雍以右都御史總督兩廣。開府梧州。最盛。自是三邊宣大之總督。以至內地帶提督者。皆然。若巡撫則不爾。先君代楊襄毅總督駐密雲。晚堂則不舉炮奏鼓吹云。楊公固如是。得非密雲適京輦。當稍從裁省耶。然自是之後。巡撫亦無不舉炮奏鼓吹矣。倭變來。巡江御史亦行之。五六年。前。吾州兵道亦行之。內地之人。少聞金鼓。不無駭異。又每一台使行部。則

寂然無聲。去而復作。殊不為雅。

余于嘉靖中見在都一二翰林有乘兩人肩輿出城飲宴者。以為怪事。至萬曆甲戌。郎署往往有之。不復以為異矣。同寮二三少卿。至乘四人肩輿開路出西北郭門。無有問之者矣。

余在鄖日。襄陽楊兵巡一魁。以考滿吏部題覆陞湖廣右叅政。仍管兵巡事。當時每有文移稱右叅政。仍管兵巡事。余竊非之。以為非仍字。蓋緣不移道而設。不當入銜。偶閱萬曆癸未登科錄。則倪銀台光薦。以工部左侍郎仍管通政使事入銜。皆可笑也。當時代言者亦誤。只當稱掌通使政事。不當言管通政使事也。

世廟晚年不視朝。以故羣臣服飾不甚依分。若三品所繫。則多金鑲。雕花銀母。象牙。明角。沉檀帶。四品則皆用金鑲。玳瑁。鶴頂銀母。明角。加楠。沉香帶。五品則皆用雕花。象牙。明角。銀母等帶。六七品用素帶。亦如之。而未有用本色者。今上頗注意朝儀。申明服色。于是一切不用。惟金銀花素二色而已。此亦不觚而觚之一也。

主事署郎中員外郎。不得繫花帶。而武臣自都督同知。以至指揮僉事。凡署職者。皆得繫其帶。□□初以來沿襲之久。遂成故事矣。獨會典所載服色。武職三品以下。有

虎豹熊羆海馬犀牛之制。而今則通用獅子。略不之禁。此不可曉也。

宋人諸公卿往返。俱作四六啟。余甚厭之。以為無益于事。然其文辭。尚有可觀。嘉靖之末。貴溪作相。四六盛行。華亭當國。此風小省。而近年以來。則三公九卿。至台諫。無不投啟者矣。漸次投部僚。亦啟矣。撫按監司。日以此役人。司訓諸生。日以此見役。皆不能外諛諛辭。不能脫卑冗。不知何所底止。余平生不作四六。然未嘗用此得罪。分宜當國。而家人永年。專為世蕃過手。署號白鶴坡。無不稱鶴坡者。一御史朱與之。稱義九弟。而小九卿給事御史投刺。十蓋一二。至江陵當國。而家人子游七司其出納。署號曰楚濱。無不稱楚濱者。翰林一大僚為記以贈之。而二給事皆李姓。與之通婚媾。翰林諸公贈詩及文。而九卿給事御史投刺。十至四五矣。徹侯綏帥。延飲必上坐。衣冠躍馬。洋洋長安中。勢尤可畏。後事敗。一坐絞。一坐斬。人心雖快。而士大夫之體。則已糜爛不可收拾矣。

先君初以御史使河東。取道歸里。所過過撫按。必先顧。答拜之。出酒食相款。必精腴。而品不過繁。然亦不預下請刺也。今翰林科道。過者無不置席具啟肅請矣。先君以御史請告里居。撫按來相訪。則留飯。葷素不過十器。或少益以糖蜜果餌海味之屬。

進子鵝必去其首尾而以鵝首尾蓋之曰御史母食鵝例也。若適年以來則水陸畢陳留連卜夜至有用聲樂者矣。

先君巡按湖廣還見諸大老止以刻曾南豐集大明律例各一部為贄。嚴氏雖勢張甚亦無用幣也。二年在楚所投謁政府絕不作書。當時匪直先君為然有用幣者知之則頗以為駭矣。

余以刑部主事慮因江北見巡撫必侍坐抵家及所過道路過之皆然惟審錄舊規以勅諭事重且多年深正郎故有僉坐之說而亦不能盡守。當時戶工二部固無論也。及余以副都撫鄭陽所見主事以上無不僉坐者間有一二人持不肯亦必強之坐不容獨異也亦不知起自何時。

余舉進士不能攻苦食儉初歲費將三百金同年中有費不能百金者今遊過六七百金無不取貸于人蓋贄見大小座主會同年及鄉里官長酬酢公私宴釀賞勞座主僕從與內閣吏部之輿人比舊往往數倍而裘馬之飾又不知省節如此將來何以教廉。

河南淮北山陝諸郡士夫多仍王威寧康德涵之習大小會必呼伎樂留連宿飲至

著之詞曲。不以為怪。若吳中舊有之。則大概考察削籍不堪復收者。既而聽用在告。諸公亦染指矣。又既而見任陞遷及奉使過里者。復瀾倒矣。乃至居喪未久。輕練白紵。左州侯。右夏姬。以縱游湖山之間。從人指目。了不知怪。嗚呼異哉。

余在山東日。待郡守禮頗簡。留飯一次。彼必側坐。雖遷官謁辭。送之階下而已。遣人投一刺。亦不答拜。蓋其時皆然。其後復起。累遷山西按察使。一日清軍提學二道。偕約余同宴。二郡守陞官者。置酒于書院。余甚難之。第令列名與分而辭不往。乃聞其糖果張嬉樂。且賓主縱飲。夜分而罷。頗以為怪。後問之余弟。乃知近日處處皆然。不以為異也。

余初任山東時。布按二司後堂。無留郡守坐者。留之坐。則必于私衙。雖設飯無害。而起官至山西臬。則自守以至倅理。無不留坐後堂者矣。當時撫按不留郡守令坐。司理縣令行取。亦只立待茶而已。今兩直隸至留飯矣。聞之各省。尚不盡然。

二司自方伯以至僉憲。稱撫台曰老先生。稱按院則曰先生大人。其語雖不為雅。而相承傳已久。二十年來。凡宣大之守巡。與吾兩直隸之兵備。皆以老先生稱按院矣。余初于西曹見談舊事。投刺有異者。一大臣于正德中。上書大監劉瑾云。門下小廝

某。上恩主老公公。嘉靖中一儀部郎謁胡國公。勛則云。渺渺小學生某。皆極卑謫可笑。然至余所親見。復有怪誕不經者。一自稱不佞。至通家不佞。年家不佞。治下不佞。鄰治不佞。眷不佞。一自稱牛馬走。亦曰通家治下牛馬走。一曰湖海生。形浪生。一曰神交小子。一曰將進僕。一曰未面門生。一曰門下沐恩小的。一曰何罪生。此皆可嘔噁不堪捧腹。

袴袖。戎服也。其短袖或無袖而衣中斷。其上有橫摺而下復豎摺之。若袖長則為曳撒。腰中間斷。以一線道橫之。則謂之程子衣。無線道者。則謂之道袍。又曰直掇。此三者。燕居之所常用也。邇年以來。忽謂程子衣道袍皆過簡。而士大夫宴會。必衣曳撒。是以戎服為盛。而雅服為輕。吾未之從也。

分宜當國。而子世藩挾以行黷。天下之金玉寶貨。無所不致。其最後乃始及法書名畫。蓋始以免俗。且鬪侈耳。而至其所欲得。往往假總督撫按之勢以脅之。至有破家殞命者。而價亦驟長。分宜敗。什九入天府。後復佚出大半入朱忠僖家。朱好之甚。豪奪巧取。所蓄之富。幾與分宜埒。後歿。而其最精者十二歸江陵。江陵受他饋遺亦如之。然不能當分宜之半。計今籍矣。使若用事大臣。無所嗜好。此價當自平也。

畫當重宋。而三十年來忽重元人。乃至倪元鎮以遠明沈舟。價驟增十倍。瓷器當重哥汝。而十五年來忽重宣德。以至永樂成化。價亦驟增十倍。大抵吳人濫觴。而徽人導之。俱可怪也。今吾吳中陸子剛之治玉。鮑天成之治犀。朱碧山之治銀。趙良璧之治錫。馬勳治扇。周治治鑲嵌。及歙呂愛山治金。王小溪治瑪瑙。蔣抱雲治銅。皆比常價再倍。而其人至有與縉紳坐者。近聞此好。流入宮掖。其勢尚未已也。

兄弟之子曰從子。自是而推。次從兄弟之子。次五服以內兄弟之子。次妻之親從子。與姊妹之子曰甥者。次知己義兄弟之子。次五服以外兄弟之子。是諸子者。行必隨行。坐必隨坐。不可踰也。次中表兄弟之子。次同年之子。次寮會友之子。年齒懸絕者。行必隨行。坐必侍坐。有宴會不並席也。子之同年。與遠戚兄弟之子。雖同年之子。而年位高者。行不必隨。坐不必侍。不據上席可也。今獨同年之世講重者。身貴而為同年之子。多賤故也。何以明其可少殺也。同年至宰輔而身下寮。則不敢講敵禮也。遇公事。糾攝不避矣。甚至勢避而首相傾。名軋而陰相毀。有利必相競。有害必相擠。即先君子之難。與後之凡不獲伸。伸而不能盡。一一皆同年為之。故曰可少殺也。

四十年前。山人出外。僅一吳擴。其所交不過數十人。然易為援拯。足自溫飽。其後臨

清繼之名最重。吳縣繼之。鄞縣又繼之。名重又所獲亦皆不貲。今盡天地間皆山人。不必皆能詩。而應之者力多不繼。則亦不能盡如意。羯羠不均。其稍有才而黠者。或借名以誘之。或援勢以脅之。或故為偃蹇以示重。或別創毀譽以相傾。而下則詈罵排詆。又其下則奔趨丐乞而已。士大夫罷官。武弁不得志。太學諸生不獲薦。亦自附于山人。以暫實其橐。而吳中尤甚。近有作山人歌曲者。雖若傷浮薄。而模寫之巧。亦足令快心。

尺牘之有副啟也。或有所指譏。或有所請托。不可雜他語。不敢具姓名。如宋疏之貼黃類耳。近年以來。必以此為加厚。大抵比之正書。雖簡其辭。而無他說。或無所忌諱。而必欲隱其名。甚至有稱副啟一副。二至三至四者。余甚厭之。一切都絕。即以我為簡褻。亦任之而已。

觚不觚錄終